



JANUARY 2024

VOLUME 64 | NO. 01

Khristian Thukizakna



EBC KUM THUPI 2024

Kipumkhatna

== EPHESATE 4:3 ==

01 KUM THAK NI

14 NIPI SKUL PAT NI

26 REPUBLIC DAY

EDITORIAL BOARD

Editor

Rev. Dr. S. Vung Minthang

Managing Editor

Rev. Thawndoulia

Contributing Editors

Rev. K. Kamchinkhup

Rev. Nenglian Vualnam

Production Managers

Rev. V. Thangkhanmuan

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

Design & Setting

Upa Khuplaljem Guite

Lakman:- Kum khat ₹ 150.00;
Dak ah ₹ 200.00; Bu khat ₹ 15.00;
Gamdang US\$ 20.00

CONTENTS

1. EDITORIAL	: 01
2. KUMTHAK A VUALZAWLNA MUH DING DAN	: 03
3. PATHIAN TOH KIMPUMKhatNA	: 06
4. GAM TOUPA A AHI!	: 9
5. DOTNA LEH DAWNNA	: 17
6. BIBLE STUDY	: 18
7. GAMMIAL AW	: 23
8. DORCAS CORNER	: 29
9. REPORTS	: 31
10. EBC INNSUNG THU	: 35
11. THU TUAMTUAM	: 36
12. ORDAIN SUNNA	: 37
13. KIPATHU GENNA/ THUMNA MAKAI	: 39

Thusuah ding piakna:

Editor,
Khristian Thukizakna
Dorcass Hall, P. O. Box - 6,
New Lamka,
Manipur - 795006, India.

*Thusuah sung-a kigente
Evangelical Baptist Convention
Saptuam ngaihdan ahi kim kholkei.
Thusuahte in amau thusuah ah moh a
pawtek ding uh.*

KUMTHAK A HINDAN THAK

*Huaiziakin tuin sepaihte TOUPA'N, "Na lampite uh ngaihtuah un," a
chi hi (Hag 1:5)*

Pathian pina ziak in theih louh gam a khualzin bang maiin kum 2023 Pathian hatna toh phu mualsuah dinmun ah i om, i kipak mahmah hi. Tu kumthak a hindan thak apoimoh dan i gen zek ding. Hiai kumthak maituah dia i kisak laiin i thiltuhsate apan sinlai lak ding om ding in i ngaihtuah hi. Chikmah a tangthu a bei ngeilou ding galpi maituah i hi ua tuin leng i maban ding uh bang ahia chih kuamah a gen thei i om kei lai uhi. Michih a neupen apan alianpen tan ah i maban ding uh agen thei leh a gen ngam kuamah i omkei hi. Tuni a i gen zingchia dik nawnlou zel khop in khovel kiplou ah i om uhi. Maban chiangloui toh kumthak maituah i hih manin Toupa lama kik a i gamtat hoihloute ua kipan Toupa deihdan a kibawlthak ahun takzet ahi.

Toupa Vaihawmpa ahi. Bible i et chiang in mihingte khang tangthu kichi Pathian nasepdan chiamtehna ana hi chih i mu hi. Galdouna Pathian galdouna ahi a, vualzohna Pathian apan ahi a, vual lelhna leng Pathian akipan mah ahi. Gam leng Pathian a ahia Amah hih lungkimte'n gam aluah ua, Amah taisante'n gam aluah theikei uhi. Tuabang mihing thiltuahte chiamtehna thute khang tangthu (history) a kichi a himahleh ataktak in Pathian gamtatna thute (His story) ahi zaw hi. Tulaitak buaina i tuah uh Pathian in bang deih ahide aw chih zonkhiakna kum in zat i sawm ding uh.

Toupa Hondampa ahi. Toupa hondampa ahi i chih laiin Bible mun khenkhat ah Pathian in amite sapna a dawn noplouh hun om hi. Amite khelhna kisiklou a akilawmsakna lel a Pathian a sap chiang un Pathian in dawng nuamlou hi (Sam 66:18; Is 59:2; Jer 14:12; 22:21). Thumna ah kuhkal ding in Bible in hon hasuan hi (Lk 18:1ff). Himahleh, Pathian a hih utlouh pipi hihsak zou dia thum ding chih a Pathian thu hon sinsak (theology) ahikei hi. Pathian belte kia Aman hondam sek hi.

Toupa Vualtungtuangpa ahi. Mi khenkhat in Pathian musit thei mawk uhi. Nidanglai in Rome kumpi khat Antiochus kichi in Jesu Khrist kichi ana musit mahmah a amin a leng sam lou Galilee mipa (the Galilean) chiin a temsau vanlam a liktou in Jesu chou hi. Himahleh galdouna ah lohsama ahinna abei ding kuan in Jesu ana bawlsiatpa kianga vanlam nga in “Galilee mipa aw nang nahon zouta ve” (thou have conquered me O, thou Galilean) chiin a si hi. Jesu laulou leh Amah musit kuamah a kisiklou a om kei uhi. Leitung a Pathian laulou a nuamsa ding a kigintakna tuh setan khemna lauhhuai pente laka khat ahi.

Pathian vaihawmpa, hondampa leh vualtungtuangpa ahihleh aminlou singtangmite bangziak a hichibang buaina hon tuaksak ahi ding? Bangziak a i gam apan hawlkhiaik dia muhdah leh simmoh a hon omsak ahi ding? Hiaite i ngaihtuah chiang in Pathian i gam leh i nam tung a a lungkimlouhna om hiding ahi hon chisak hi. Melmate hon kouna leh min hon phuahsakte un i hihna honmuhdan uh agenchan hi. Awiloute’n zu leh khamtheih toh hon mukhawm ua poppy toh hon mukhawm ua Jesu Khrist toh hon mukhawm lou ahipeuhmah uhi. Pathian hehpihna in solkal a sepna nei tampi i om ua himahleh sepna muna painuamlou, akhente semlou a khaloh la, khenkhat ngial sepna nei ahihnam leng kitheilou khop a mundang leh state dang khawng a om san chihte leng om dan in akigen hi. Hiai tuh i gam dinmun ahi. I gam hichipi in Pathian kiang ah i thum thum mawk uhi. Kisikna tellou, kingaihniamna tellou, Pathian kihtakna tellou khristianna Pathian adia kihhuai ahikha ding e! i kingaihtuah thak ding uh. Gam bawl na ding in assembly election khawng ah ginna i koih ua, kum tampi palai i telching zel ua, himahleh politics in i suahtakna ding lam sang in sum nekding dan i buaipih zaw ua, kumtampi i genlouh uh tuin agah i lou ta uhi. Pathian i naih taktak nop keilai uleh Rohingya bang a tavaih (beidong) thei dinmun i hi gige uhi. Toupa ka khialta uh, ka kibawl pha ding uh chi a Toupa i naih uh ahunta hi. Kum 2024 Toupa lama kibawlthakna kum i hisak ding uh. Bible in “Israel hotdamna zaw Toupa i Pathian kia ah ahi a-om,” achi hi (Jer 3:23; Ps 20:7). ■

*Kumthak Message:***KUMTHAK A VUALZAWLNA
MUH DING DAN**

- Rev S Vung Minthang, *EBC, General Secretary*

Atangpi in nam sang zodeuhte nasep dan ana siam deuh se uhi. Eimite'n vaite khawng nasep dan niangnuang peuh i chih bawl sim hang un amaute apan i sinding uh om hi. Adiak in Coolite nasep dan i et leh khawl vanzat lianpipi van gikipipi dom kheding hiam koihlut ding hiam a akisak chiang un tampipi akipunkhawm sek uhi. A tha uh a pankhawm theihna ding in khat-nih-thum chihdan in akikou ua, akhenchiang in la hileh kilawm bang in asak thoh zezen ton uh aom hi. Huchiin awl awl in tha apekhawm ua hih zohlouh a neikei phial uhi. Ei singtangmite bel kinoh hehu, tawlgawp pah, hichisuk heh chia chimtak pahte i hi uhi.

Hiai i genna ziak bel, kum thak 2024 mel i muta, kipahhuai ahih kawm kawm in maban asah mahmah hi. Kinoh hehu a thagum toh hihveng zat buaina ahi kei. I gintak sang a khauhzaw ding, sawtpi daihdng buaina ahi. Thuakzou taka lungkelou a Toupa hatna toh i kalsuan keileh a sezaw sem maituah kha thei lai i hi. Tukum thak pen kumdang toh kibanglou maithei ahihman in pilvang taka i maituah apoimoh hi. Mosi in “ka damsung nite uh simdan honhilh in” ahih bang in i hindan uh kivel thakna ding om hiin i thei hi. (Sam 90:12).

Pathian mel i zong ding uh: I heutute un i buaina avenna ding in ‘political solution’ apoimoh ahih uh adik mah hi. Hileleng, politics i chih leng mihingte mah i hilim uhi. Delhi a thuneipen i chihte leng Pathian ukna nuaia om ahi uhi. Amaute lungsim thunun thei Pathian ahi. Gamte leh namte bawlp a Pathian ahi. Amah a kumpi tutphah ah tulai hi. Aman mi “zawngte a hausasak a, ahihniam a ahihsang” thei hi. Toupa'n “Leivui a pan a zawngte dingtoug sak a, ekvu a pan khutdohte a domtoug a... miliante kiang ah a omsak thei hi” (2 Sam 2:7,8). Eilawi leltak

state government khat toh kidoua tutan hingdama i om lai uh leng Toupa hon ompihna ziak ahi. Toupa, kumpite Kumpipa leh toupate Toupa ahihna phawk chetna kum suaksak in mihing a muanna ngalou in Toupa muang zaw ni.

Pathian i Lau ding uh ahi: Pathian mel zong ding i chih chiang in tulaiin 'Pathian kiang thum' chihna kia ahikei hi. I thumsung kia a Pathian mel zong, i thumlouh chiang a Pathian mel zonglou khristian i hih louh ding uh ahi. Pathian deihlouh thilte i hihkhak ding lau, Pathian i tung a ahehkhak ding launi chi i hi. Pathian i lauh taktak leh i khotanga siatna zouzaite i tawpsan uh akul hi. Thumna a sun leh zan a ana pang i saptuam mite khitui i zahtaka amaute ziakin Pathian min i phat hi. Himahleh, a thum mite hilou a khotanga thil sual hihte ziak a Pathian thangpaihna thwak theih lai ahi. Pathian pen eilama pang utloup i zawn teitei i hikei uhi. Eite Pathian lamah pang leng Pathian hon panpih ding a mansa hizaw ahi. Joshua bung 7 a Akan in Pathian a hehsak laiin Joshua leh a lawite leivui lakah a thum uhi. Pathian in a

thumna uh a dawnna tuh "Thou in, bang achia bokkhup nilouh" achi hi (Jos 7:10). Thumna ahoih a himahleh i laka Pathian huat thil omte lakheloupi a thumna Pathian in za nuamlou ahi. Pathian in adeih tuh kisikna leh khelhna tawpsanna ahi (2 Kro 7:14; Ez 14:6; 18:30; Nas 3:19).

Tumalam deuh in khopi khat a ei singtangmi omten thusuah khat ahon bawl uhi, singtang mi kuapeuh khopi a hong galtaite'n khamtheih himhim hon polut nawnkei un chih ngetna ahon bawl uhi. Agendan un tuma kum sawm malam khawng in Lamka lam mite mihoih leh laisiamte chiin hon musang uhi. Tuni chiang in bel huailamte chih ahon theih chiang un local miten koihdan khat hon neita ua zumhuai ahi achi uhi. Khamtheih hihte, khamtheih a sum dawngte, poppy chingte chiin miten ahon ngoh uhi. Pathian mite midangte'n ahon muhdan uh a dahhuai lotel hi. Gal ziaka site i phawk ua melmate hon thah ahi chiin i dou khawm uhi. Tuamah bang in khamtheih a si leng tampi i omta ua, himahleh khamtheih pen melma i chi nuamkei uhi. Meiteite i gal i chih bang un khamtheih leng

i gal uh ahi thou kei maw? Bang ding a khamtheih hichi lawm lawma i society a zung kaisak i hi ua? Khopi sung a zu leh khamtheih, diktatlouhna, kimuhdahna soal thilhihte i tawp san kei uleh Pathian apan hotkhiakna i gam in a ngahlouh khak ding a lauhhuai pen hi.

I Khristianna uh mite muh in i taklang ding uh. Hiai kumthak 2024 ah Pathian thu awite i hihna khovel mite muh theih ding in hinkhiakpih i sawm chiat ding uh. Tua i chih in lampi zui a placard tawi a khristian ka hi uh chih ding hilou in i omdan leh gamtatdan un Khrist nungzui i hihdan i taklang ding uh, i chihna ahi. Saptuam heutu leh tuailai makai, Numei pawl makai, naupang pawl makaite Chiang beek in i nasepna mun office, workshop, dukan, loukuanna, bazar kaina chihte ah i biakin sung hindan uh hinpih leng kikhekna masa a hong tung ding hi. Tuaban ah minautang gingtu dawrkaite'n Pathian deihdan zong ding, Auto pute'n Pathian lauhna toh, Bazar a tute'n Pathian muanna toh, Bazar kaiten kampau kilawm leh kamsiam suah in Toupa mite i hihna diktatna leh siangthouna ah sulang in

khotang muh theih in Jesu Khrist i tawisang ding uh.

Khristiante Pathian pen thilsiamte Pathian leng ahi. Genesis a thilsiam thu ah Pathian in a thilsiamte a en a hoih asa hi chih i mu hi. Genesis bung 1&2 sung ah NKJV ah hoih chih thumal sawm-le-khatvei a om hi. Pathian in hoih asak mahmah thilsiamte mihingte'n i hihsia uhi. Khua hong keu Chiang in gamlak i hal sia ua, luitui siang kelkel ding hinazenpi i hihnin ua, i gammang singte hing dipdip nuaia huihvot hiauhiau toh i gam a teng thei hizenpi, akulloupi a thilsiamte kemsiamlou in i gam kilawmna a mang hiai hiai hi. Mipil gamte'n agam uh puah hoih in tourist khawngte samlut in summuahna'n anei ua, ei pawl in i gam kilawmnate satsia in tomchik daih ding sum muhna chiin gam nuamlou, gam thanghuai i suah uhi.

Pathian thilsiamte mihingte'n i poimoh banga i zat theih ding a Pathian thawnpiaak ahi uhi. I gennop bel, Pathian thilsiamte tung a hiamgamna, i kim i kiang a hinna neite akulloupi a suksiatnate tawpsan ding i deihna ahi. Mata Dam hiam luidung a dynamo zang a

nga matlouh ding chia kham ahihlaiin aguk a zang veve, nganou tampipi man a tuate alet uh ngak zek leng inkuan tampi hinna tham hidingte ahi uhi. Singgahte, meh kungte khatvei nek ding kia en a, i phuk ziahziah pen kumtampi supoi ban ahi. Gammang singte zuak ding kia a en a, gamlak sa leh vasa kilawmte thah ding kia a i et nilouh ding hinawnlou ahi ,i gam kisegawp dia kisa ahita hi.

Thilsiamte toh kituak-kilem a khosakna kichi achil apan Pathian in ana tup ahi. Tua ziaak in, mihing a enkol ding in sep hi.

A enkol dingte a hihsetu a pang chih pen Pathian tung a mohna hithei ahi. I omna peuh a sing-legua toh khosa khawm theilou, ganhing toh lah khosa khawm theilou, i luitui teng ulah hihnin, i kholaitte uh nin paihna suak chihpen Pathian hing bia ka hi kichite hin dingdan hilou ahi. Gampek lianpi i nei ua sepding omlou chih sang in khut nasep leng uangbawl in Meitei nupite hon supply teng eikhut a sem in piangkhesak leng khosak lahna ding omlou ahi. Tu kumthak a Toupa vualzawltak nam hiding in Toupa'n hon ompih chiat hen. ■

PATHIAN TOH KIPUMKHATNA

- Rev Paukhanmang Guite, *GBC Principal*

Thupatna: Tukum 2024 a i saptuam khalam kikepna thupi dia i tel “KIPUMKHATNA” ahi. Thupi khennen in, January thupi di’n “**Pathian toh Kipumkhatna**” i chi hi. Hiai bang thugin sahkua tuamtuamte’n leng na kisinsak uhi. Hindute’n “Atma” a chi ua, khalam hinkhua, Pathian toh pumkhat suak, chih kisinsak uhi. Budhishte leh sahkua khenkhatte thugin (concept) ah leng telkha hi. Amau sinsaknate ah leitung a hinsung a leng Pathian toh Kipumkhat hihtheih ahi, chih ahi. Ei Khristiante thugin (doctrine) bel amau thugin toh kibanglou, huai khenlam ah ahi, chih theih masak poimoh i sa hi.

I Laisiangthou a i muh bang in, Pathian tangtawn lunggel, “...a hunbi hong kim Chiang a, thil

tengteng, van a omte leh leitung a omte, **Khrist a gawmkhawm a, a suktuah vek ding**” chih

ahi (Eph.1:10). Hiai a thiltup hihtangtunna ding in, Pathian in a hehpihna ziak in Khrist tungtawn in thil bangkim toh kilemna bawl a (Eph.2:1-10); hiai tungtawn in leitung a mihingte a kideidanna lakhia in namte kal ah kilemna bawl in (Eph.2:11-22); hiai thil nihte pansan in leitung gamchih a Gingtu mimalte kalah kilemna bawl hi (Eph.3:1-6).

Pathian toh kipumkhat hinkhua Laisiangthou in hon sinsakdan tomkim in i enkhawm ding:

1. Kipumkhatna genchetna:

Hebrew pau ah Khat genna thumal nih om hi. Khatna:

“*yakhad*” – A kibang (Single), Avek a khat (Only one) genna ahi a; Nihna: “*ekhad*”- Lomkhat/Honkhat (Compound/Collective) genna ahi. Greek pau ah, “*henotes*” – A thu leh muhtheih a thukhat/kibang a om (The state of being one in agreement and uniform), chih ahi. I Laisiangthou a Pathian khat leh Khrist a Pathian leh mihingte kipumkhatna genna thumalte ah “*Yakhad*,” huai tuh Lomkhat (Collective) hilou in, Khat a om (Single/Only One) genna thumal kizang hi.

Kipumkhatna

Webster Dictionary ah “*Pumkhat a omkhawmna*” chih ahi.

Hiai in Lungsim leh Taksa a omkhawmna lam gen hi. Ephesate bung 4 - 6 sung ah, Lungsim leh Taksa Pumkhatna khenlam gen hi. Saptuam Kipumkhatna tuh Gingtute honsamtu Toupa Khat, Hotdamna a kibang, leh Khrist pumpi a kahiang tuamtuum, himahleh kipumkhat hih genna ahi (cf. Eph. 4:5). Laisiangthou in Kipumkhatna genna in Greek pau a “*Thagui*” genna thumal (Eng. Ligament/bond, Eph.4:3) zang hi. Ligament tuh Mihing guhtuahte kankhawmtu thagui genna ahi. Khrist a Pathian toh Gingtute kankhawmtu/kipumkhatsak thagui tuh Kha Siangthou ahi, chi hi. Hiai khalam lungsim kia a theihiam theih ahihman in sawltak Paul in Korinthte leh Ephesa saptuamte kiang ah, mihing theihiam ding deihna in, Khrist a Pathian leh mihingte kipumkhatna genchetna ding in “*Mihing pumpi, kahiang tuamtuum om, pumpi khat hi*” chih zang zihzeh hi (1 Kor.12:12-31; Eph.4:1-16).

2. Pathian a mi thumte

Kipumkhatna: Johan in, Pathian khat a mihihna thum (Trinity), “*Pa, Thu leh Kha Siangthou*” ahi chiin genchian hi (1 Jn.5:7). Bangkim Pathian leh Pa khat

hia a om; amah bangkim tung ah a om a, bangkim a musuak a, bangkim sung ah a om hi (4:6). Genesis 1:1,26 a, “Atung in Pathian in lei leh vante a siam hi” chih a, ‘Pathian’ tuh Hebru thumal ah ‘Elohim’ - ‘El/Eloah’ leh ‘im’ (Uni-plural), khat sang a tamzaw genna, kizang hi. Hiai in Pa, Tapa leh Kha Siangthou, Pathian Khat (Heb.*yakhad*), **Kipumkhat** ahi chih genchian hi (cf. Mt.28:19; Jn.6:27; 20:28; Nas.5:3-4).

3. Khrist leh Gingtu Kipumkhatna: Sawltak Paul in Pathian Thuguk (Mystery), Jawlneite’n a muh phaklouw uh, Adam leh Evi nupa a gawm a, Sa Khat hita a chih (Gen.2:24), Khrist leh Gingtute Sa Khat, Khrist Saptuam Lutang hi a, Saptuam Khrist Pumpi ahihdan, genkhiakna ahi, chiin na genchian hi (Eph.5:32). Pathian lungtang ah Khrist leh Gingtu Kipumkhat ahita uhi. Huai ziak in, Gingtu tuh Khrist hihna koppih, amah toh kipumkhat, a sihna a si khawm, vuina a vuikhawm a om, a thohnawn bang a thounawn ding, i hi chiin gen hi (Rm.6:5-6).

4. Pathian leh Gingtu Kipumkhatna: Jesu Khrist, Pa

Pathian toh Kipumkhat ahi ua, Gingtu Khrist toh Kipumkhat ahi uhi. Gingtu in Khrist hihna koppih ahihtak man in, Khrist toh Kipumkhat, Pa Pathian toh Kipumkhat a hita ua, vanmun a Pathian taklam a Khrist toh tukhawm hita uh ahi, chi hi (cf. Kol.3:3). Khrist toh Pa Pathian kipumkhat ahiahbang un, Gingtu leh Khrist Kipumkhat hita in, Khrist ziak in Pathian leh Gingtu pumkhat hita ahi uh chih Jesu mahmah in gen hi (Jn.17:11-23; 2 Kor.5:18-19). Sawltak Paul in, “Toupa zop bel, amah toh Kha pumkhat ahi uhi” na chi hi (1 Kor.6:17).

Pathian leh Gingtu Kipumkhat hihna hinkhua a lahkhiak dingdan: Gingtute Khrist toh Kipumkhat a om dia siam i hita (2 Kor.5:17). Huaiziakin, leilam thilte ah hinawn lou in, Tunglam thilte a lungsim ngata dia sinsak i hita hi (Kol.3:2).

Pathian omna tunglam thilte i theihsiam a, i hinpih theihna ding in Pathian Thu, **Laisiangthou, sim i limsak** ding aloutheilou a hita hi. Pathian lungsim thei a, amah hihna theichian a, amah deihdan leh theihpihtu hi dia hon lametdan theichian a, tuabang a i hinkhiakpih theihna dia Pathian

Aw sun-le-zan a ngaihtuah a i lungtang a i vom ding poimoh hi (Sam 1:2; 119:1,2,10,11,82,97,103, 105,111,112,143,147).

Laisiangthou thu i lungtang a i ngaihtuah tamsem leh, Pathian hihna theichian sem in, Amah toh Kipumkhatna thukzaw, hatzaw, kichianzaw leh kipzaw i nei dia, Amah batna ah i khang semsem ding hi.

Pathian toh kithuahna **Thumna lunggulh leh limsak** in i nei dia (1 Thess.5:16), Pathian toh kinaih semsem in, Mosi bang in Pathian thupina i hinkhua ah i tangsawsak ding hi (Eksodas 34:29-35). Amah lungsim leh deihdante theichian semsem in, i pianken lui leh nidanglai hindan luite suahkhia in, A diktatna, Sianthouna, Itna leh Zahngaihna ei ah lahkhiak in om ding a, A hon lamet bang

Khrist nungzui muanhuai leh theihpihtu gahsuah i hiding hi (Eph.4:22-23).

Thukhitna: Gingtu, Pathian toh Kipumkhat ka hi kichitate'n Pathian a om Itna, Sianthouna, Diktatna leh Lainatnate suahkhe loutheilou uhi. Leitung a hinsung in, Kha leh Lungsim leh Sapum siangthou leh gensiatbei in hingta uhi. Pathian toh na kizopna Satellite tungtawn a Net Work Tower toh kibang na hi. Pathian toh na kizopna a hoih gige kei leh, na network signal a niam dia, tower sangpi ding bebu napi in, zat theihlouh in na om ding hi. Unau it, tukum 2024 bul a na din lai in, kum tawptan Pathian toh Kipumkhat gingtu na hihna, midangte mitmuh a na hinkhua a suahkhe ding in pan la thak in, chiin Toupa min in i kiasuan hi. ■

GAM, TOUPA A AHI!

- Rev T Thangzaiam, DS, EBC Thanlon

THUMAPI: Kumpi David in “Gam, Toupa’ a ahi” achih toh kisai kikum nawnleng ut huai i sa hi. Khovel a nam bawlkhetu Pathian ahi a, gam kichileng a bawltu ahi. Huan namte tenna gamgi khungtu leng Pathian mah ahi chih Laisiangthou akipan i thei uhi. *“Leitung maikaih tengteng a om ding in bul munkhat vek in namchih mi a siam a, amau ading in hun bisehte a sehsak a, a omna gi uh leng a khunsak. Pathian a zon ua, a mai a mai ua, a muh teiteina ding un;*

himahleh aman lah hon gamlat kei chiat ngal a. Amah vang in i hing in i tang in, i om uh ahi ngal a; Noumau laphuahsiam kuate hiamin leng, ei leng a suante i hi ngal ua, chia a gen bang un” (Nas 17; 26-27) achi hi. Hiai akipan i muh theih tuh ei ut hunhun leh ei thuthu a gam kichi neih theihmawk ahieh louhdan kichian mahmah hi. Pathian in gam piak hunbi, gam hawm hunbi nei hiin amuh theih a, huan gam nei theitham dia a seh namte tuh midangte belh theih namte mah ahizel uh chih mangngilh louh ahoih hi.

Alehlam a i et leh, khovel a mahni gam chih ding neilou mite gentheih dan leh vakvaih dan, ganhing bang a lehlam lehlam a vial hawl a a om dante uh alungzin huai petmah hi. Huaiziakin hiai mun kougam ahi, kou leh kou kivaihawmna gam ahi chia gen theihding gam kichian neihsam ut huai tuntun sakna hong lian petmah hi. Tulai khovel ah gam tuam deihna, mahni kivaihawm tuam utna leh lunggulahna ziaka kiphinna a tam mahmah hi. Eileng i pi leh pute hun a kipan Pathian in luahdang a hon piak hiai zogam ah i om uhi. Himahleh ki vaihawmna dan ah thuneihna neilou in, gam leitang tung a thuneihna leh kepbit theihna neihlauh zia in, bit i kisa kei ua, salam ah hih theihteng hih in, van Pathian mai ah kap leh mau in a zahngaihna i ngen uh hi. Ahi dingmah ahi, huchihlaiin i lungsim ua mangngilh ngeilouh dia deih huai tuh:

GAM TOUPA A AHI! British ten *“Chiefs are the lord of the soil”* a chi uh, chia kigen ka za kha ngei hi. A na gen uh leng ahikha maithei ding a himahleh hiai khong tunglik lawliang in, Pathian mel i liah sakkhak ding pilvan huaizaw sakna lianpi ka nei hi. Laisiangthou i etleh kumpi David thumna la in lungsim hon sukha mahmah hi. *“TOUPA AW ka pu uh Israel Pathian, khantawn a phat in om hen. Aw TOUPA, thupinate, thilhihtheihnate, pahtawinate, zohnate, lalnate nang a ahi a, lei leh van a om tengteng lah nang a ahi ngal a, Aw TOUPA, gam nang a ahi... (I Kronikil 29;11-12)* achih thu ahi. David tuh dinmun sangtak kumpi hi hial mahleh thumdan a siam a, a thumna la inleng genkim mahmah hi. A vaihawm sungteng khaikhawmna ahi chileng le genkhial lawmlawm ding in ka ki gingta kei hi. Toupa van Pathian kiang ah *“Aw TOUPA,*

thupinate, thilhihtheihmate, pahtawinate, zohnate, lalnate nang a ahi a, lei leh van a omtengteng lah nang a ahi ngal a...” chia a thumzoh in, “Aw Toupa, gam nang a ahi” a chih pentak thupi ka sa tungtuan hi. I pi leh pute hun akipan singtang kho tuamtuam ah i tengkhawm un, i khosa khawm tiltel uhi. Huchi ahihlaiin “mun khenkhat ah thuneihna zatkhelhna om simsim ahi kha diam?” ka chih hun a om hi. Ka gam ahi, ka khua ahi, na hichih keileh hichi aw... khachi aw chia khua leh tuite nawh kha zenzen i om zenzen leh ki etthak tuak ding hi.

Pathian nei nam i hih man un gam neitu Pathian ahi chih i haihkei ding uh. David in kumpi himahleh bangkim Pathian khut a om ahi chih a haihkei hi. Pathian in theihphak louh hun akipan i gam nuamtak hon luahsak hi. Hiai mun lou koimun mah ka gam chihding i neikei uh chih i phawk ding uh. Khat leh khat kidemtuah hiam, mahni ading chiat khual in i phaphet kei ua, pankhawm haksa i sa petmah uhi. Mahni nam leh pau chiat tawisang sawmna ten kipumkhatna ding hondal mahmah hiin a muh theih hi. Tulai ngial in “Common enemy”

doukhawm i hihlam manggilh dekdek i hi uhia? ka chinuam hi. Gentaksa bang in khovel ah koimun mah taisiatna ding mun leh mual i neikei uh. Huaiziakin i gam uh humbit sawm in chin leh ha suang in i pangchiat ua, i pangtou zel ding uh aw.

Mizoram ka zin khak Chiang a lungsim hon tawldam sak mahmah tuh signboard kigelh “Ram chu Lalpa ta ani” achih uh ahi. Tulai tak in Vongkawt (Manipur - Mizoram border) ah signboard “Kan Unaute, Kan lo lawm ache u. Zofate Jerusalem in lo thlengta, Thlamuang takin awm ang che u” chih a takkhia uhi. A et a nuam in a khamuan huai banah a Khristian huai petmah sakin om hi. Sinlai tampi sinding honpia hiin a ngaihsut theih hi. David in “Aw TOUPA, gam nang a ahi a, mitengteng a tungnungpen na hi. Hausakna leh pahtawinate na kiang a kipan ahi, bangkim tung ah thu na neia, huan thilhihtheihna na khut ah a om a, na khut a mitengteng hih thupina leh hatna piaktheihna a om hi. (I Kronikil 29; 11-12) a chia, a muchiang mahmah hi. A dinmun a sanlai inleng gam Pathian’ a ahi chih a thei a, gamlianpi tung a kumpi ahihlai inleng gam petheitu

leh lakmangsak theitu Pathian ahichih a mangngilh ngeikei a, huaimah tuh a gam bitna ahi. I luahsa gam Pathian' a ahi chih phawk gige kawm in i it ding uh aw.

PATHIAN IN A UTTE TUNGDIING HI! Kumpi David thumna lungkhoih mahmah nawn tuh hiai ahi. *“Huan thilhihtheihna na khut ah a om a, na khut a mi tengteng hihthupina leh hatna piaktheihna a om hi (I Kronikil 29:12)”* a chih theih khong mahmah ahi. Pathian bangkim tung a thunei ahihna a muchiang a, Aman a utte tungding in a utte lainiam ahih dan bang, hi a sakte thupina leh hauhsakna pezel ahihdan a haih hetkei hi. Tu a lalna leh thuneihna tawi lellelte hiam, nam leh gam adia heutu leh makaitu hihna nei lelte leh hong hitou zelding ten hiai bil ah batchiat ni. Gam Pathian' a ahi a, gam vaihawmtu Pathian seh ahi. Eilak ah makai ut mahmah ahih hang a heutu hong hi hial leleleng i nam bangchipi i hi tuandia hia chih huai simsim a tam hi.

Ken thupi ka sak mahmah tuh kum 2016 USA election ah politician hi ngei himhim lou leh khovel nungak melhoih

tata buaipihthu, real estate lam a sumdawng hausa billionaire Donald Trump tuh khovel in lamdang a sak ding khop ua dopsang a hong hih ahi. Grand old party Republican sung ah kei ka hi chitheih leh, State Governor leh Senate member hisa leh hi lellel tampi om lak ah, hiai businessman khat a telching uh thil lamdang tak ahi. Himahleh aman a pawmkip luat khat om tuh Laisiangthou bu-66 sinsakna ahi. Huaimah tuh a lohchinna leh a lohchin nung a a gam masawwna ahi. Pathian in Abrahamte, Isakte, Jakobte kiang a kichiam a piak a nasawmna Jerusalem khopi tuh Israel khopi ding in a namkipsak miahmai hi. A sulnung gelding tampi om in jail bang zutsak khop in ngohna tuamtuam bawl mahle uh, Pathian mite humbit tu hiin ka koih a thupi ka sa hi.

I pi leh puten amau hun akipan tangthu gen nei mahmah honhilh uh ka mang theihlouh tuh Nungak “Mauluang” tangthu ahi. Mauluang tuh nungak melhoihtak ahihman in kumpi zi in hong pangkha hi. Tuabang a kumpipa zi a hong omkha leh a dinmun hoihtak ziakin a nu nawn (*step mother*) in hazatna liantak nei in a suahta hi. Vok

kon goh nuam uh na nunglam hongpha in chiin a sam hi. A mahleng kipak tak a nunglam vapha tuh a nu nawn in tuisou na buak in si a, a luang dainawl ah a pai uh kichi hi. A hun leh ni hongswat tak chiang in a pasal lamten a mounu uh Mauluang piding a hongkuan uleh a nu nawn in amah tanu Subintai ana pia a, lungkim loutak in kknawn uhi.

Mauluang sisa dainawl a apaih uh tuh Saza in va tuakkha in a sudam a, a naudon ding in a la hi. Sun chiang api leh pute loukuan kal in naudon kawm in nau awihla *“Nidang in kumpipa ziin ka om e, Tuin ka pu saza nau ka awi e...aw...e; ei...aw...e!”* chiin a nau don awizel kichi hi. Hiai tuh tangthu phuahtawm maimai ahi a himahleh, tulai khovel ah gennei mahmah hiin a muh theih hi. Khovel ah mihingte kihuatna, kihazatna leh a hatlou zawte sukchimit a amau dinmun luahdia kisakna a tam mahmah hi. Eipawl phut lallel leng hiai toh kibang hazatna ziaak a i gam laksak tupna ziaak ahi i chilou theikei uhi. I laisiangthou in *“Aw TOUPA, gam nang’a ahi a... bangkim tung ah thu na nei a, thilhihtheihna na khut ah a om a, na khut ah mi tengteng hih*

thupina leh hatna piaktheihna a om hi. (I Kronikil 29; 11-12) achi man in. Gam kichi Pathian a ahi a, a man a utte a tungding a, a utte lainiam ahi chih ahih manin Toupa’ bel ni aw. Gam Toupa a ahi ngal a!

A POIMOH PEN PATHIAN LEH MIPI PANKHAWMNA! Tampi ka gen nung in gen behnop ka nei nalai ahi. Eilam ah michih ten i mohpuakna om ahi chih mangngilh ngeikei ni. Sapten *“Liberty doesn’t descend from the heaven, It was struggles by the peoples”* a chi uh. Huai omzia tuh Zalenna kichi van akipan a mawkna a hongkia ahikei a mipite soal khiak ahi” chihna ahi. Huai ziaak in gam neihna dingin a poimoh masa penpen Pathian ahi a, a nihna ah mipi ki thutuahna, pankhawmna leh ki pumkhatna ahi. Pawl thakthak ki bawl toutou in memorandum palbawm dim kheleng le muhdung ahikei a, mipi tengteng in tup kibang nei a lohkhiaak ding ahi. Hiai talpak gal khauhtak i maituah lai un command khat nuai a omkhawm a poimoh petmah hi. A kipatnung tunitan ah leng i ki streamline taktak theikei lailai uh. Huchipi inleng i thaulawng ngatna lam kibat ziaakin haitan venbit in i om

ua, awl in hong kibawl lem na ve chihna toh ki om lailai hi. I lak thuthang vengvungte khong ka na etchiang in a Meitei gal lamlam buaipih kha nawnlou in, ei leh ei i kibuaipih zawta ua, a thazoi huaitel mai!

Ei sang a pilzaw i melmate a kholsawt zohpeuh uleh, eisung kibuai sem ding, ki phelnen semsem ding hileng a kilawm a, dahhuai mahmah hi. Tuni'n table khat umkhawm a, talsawn zen a ngaihtuah khawm hun ahih dan phattuumngai tak in ka gen ahi. Huchi hilou a mahni nambil chiat liksang a, mahni pawlchiat tuampai utna toh kal i suan ua, thusuah thei teng in thu suah gagaih a, ei phuhlouh leh pawmlouh pawl peuhmah phelsiat i sawmchiat leh i ki humbit zou tuankei ding uh. Toupa Jesu'n "savun thawl thak a uain lui thun" achih toh kibang lel i hihkhak ding uh pilvanhuai sakin om mahmah hi. Lamka level tanlel ah leng enta leng reliefs leh panpihna tuamtuum ei utna munchiat ah i sunglut zel uh chih media tungtawn in kimu sek hi. I dinmun chiat a theihtawp suah a i pannate uh thupi lua, zahtak huailua, a taisia omlou i hih man un. Himahleh i resources

tengteng uh 'pool' khawm a, a hawmkhiakna lamleng dialdial leh diamdiam a a paikei leh bangtan i pangzou ding ua? chih dot tuak mahmah hi.

Heutute Delhi zin uh chih i theihchiang in bang hiam thuhoih hong ging ding sakna toh i ngaklah mahmah sek ua lah, a ging theikei hial hi! Abiktakin tumazeka Parliament monsoon season hun a HM Amit Shah thugen ding tuh ngaklah tak in i ngak chiat uhi. A hon gen alah ei lamet louhna lam daih ah. *"A state CM needs changed when he is not in cooperating, but N Biren Singh fully cooperate with the Centre"* chih ahon genkhiak in hon hisak dedu zel hi. Meiteite khut nung hiaizah i thuakta ua, solkar thau hiaizah zah puakkhiak ahih nung inleng a gamtatna uh a acknowledge nuamkei lailai uhi. Maban uh saupi petmah neilai ding i hichih hon muchiansak kilkel hi. Ut in utkei leng pan a ngai a, i doukhawm uh a ngaita chihna ahi. Huchi ahihleh amau ei sang in a tamzaw ua, vanzat ahauzaw ua, neih leh lam a neizaw tham uhi. State machinery tengteng zang in a hon dou ua, centre in indirect tak in a gum chihleng i muhdan ahi. Banghiam ahihleh

a vengpah hetkei ding hi. Kidou touhzel ding tuh a heem inleng a gen kei ua, a genkhe toihtoih mai uh hilou maw? Kou ki pandek pan ka hi uh a chih uh toh! Tuni tanin training kipiak a kholkei ua, *'kasom parade'* neiin numei tanpha a phaphet kei uhi. Amau training zousa tengteng thaulong ngatna diing lam i theihsa chiat uh ahi.

Eiteng liiliai lah thukhat sat a plan bawlkhawm thei hetlou in, i resource teng uh pool khawm theilou in i om lailai uh maw! Hon thahgam sawm melmate toh hiai tan i kidou nung a leng ki streamline theilou i hih un tuh, i sihbei phial tan un leng i hih theih uh gintak huai taktak loubang hi. Ei hatziak hikei mahleh Pathian nei i na hih ziak mah in tutan humbit in i omlai uhi. Huaimah tuh khovel mai a mite hehpihna hon tangsak hamham tu hiin a muh theih hi. Hatlua khong i kisa kha mawk ding uh; ahi teuhkei ahi. Ei leh ei i kisai sawmchiang ua lah kihichi zelzul a hihmawk leh galdou lah dinkhawl theilou ding i hih man un. Kua hiam u zaw tantang a hon huaikhawm a hon makaih ding poimoh sakna bang ka nei maimah hi. Huchi ahihkei leh hichi zengzung pi in

zaw ki separate zoh taktak ding suangtuah haksapi sak in om khasek hi.

THUKHITNA: Kumpi David in gam kichi neitu Pathian ahihdan bang, mi teng tungding thei ahihdan a gente i enkhawmta uhi. Gelhdang ah *"Huan, leitung maikaih tengtenga om ding in bul munkhat vek in namchih mi a siam a, amau ading in hun bisehte a sehsak a, a omna gi uh leng a khunsak. Pathian a zon ua, a mai a mai ua, a muh teiteina ding un; himahleh aman lah hon gamlat kei chiat ngal a. Amah vang in i hing in i tang in, i om uh ahi ngal a; Noumau laphuahsiam kuate hiam in leng, ei leng a suante i hi ngal ua, chia a gen bang un. (Nas 17; 26-28)"* chih ahih man in. Hiai a kimu thei nawn tuh namchihte bul munkhat vek a honsiam ahihdan leh amau adia gamgi khunsaktu Pathian ahihdan khong a gen ban ah, huai gamgi khunna ding ahunbi om ahihdan a kimu theinawn hi. Huchi ahihleh eipawl a hunbi in hon paikhengta ahi diam? Gam neilou ding himhim a siam i hi tuam ua hia? Bangchik hun eipawl adia hunbi hi ding ahia? chihte khong lungsim ngaihtuahna ah lian mahmah hi. Hun paisa tuh paisa ahi

a, gentheih ahi nawnkei hi. Huchi ahihlailiin Laisiangthou in a tenna gamgi uh khunsaktu Pathian ahi achih za a za a ka pomdan ahi. I kiangzek a om Burma gamgi kanleng khauguite ki lehvialh ahi kichi mawk hi. Huai tuh Pathian gamgi khun tuh a lamdang lua khatzaw muh theih ahi chih a kitheithei nawn hi.

Huan amau ading in “hunbi te a sehsak” chih ahihna in hon khamuang sak theinawn hi. Gam Toupa’ a ahi a, michih gamgi ding bawlsak a khunsaktu Amahmah ahi. Nidanglai a pi leh pute hun i etkik Chiang in huai hunlai a baihlamzaw leh naizaw hikha dingdan eive, amau i pi leh puten ana hichih khale uh chih theihding neuhneuh i neihchiat uh ka gingta hi. Himahleh huai hunlai tuh a hunbi ahi naikei a ahi diam? chihlough gending a om kei a. Huchi ahih lailaiin tulai hun nanung tak ah hiai gal thupitak i phutkhak zenzen uh tuh, Sapte thupil in “*blessing in disguised*” achih uh toh kibang sak in om mahmah hi. Ahia melmate hon ngohna pipen tuh “Narco-terrorist” chih ahihtel lawmlawm ziakin eilam pangleng kibawl thakna ding

om kha ding hi. Hiai ngohna hoihlou tak zang in khovel mai ah belmang hon tatzou hit-het ua na mahmah hi. Pastor hiin saptuam upa hileh leng kuapeuh numei naupang tanpha, ‘Poppy’ kichi bangchi bang melpu hiam chihleng mukha ngeilou tanpha Narco-terrorist honchi vek ua, poi chih thumal inleng ahilhchian zou nawnkei hi. Pathian lauhna toh i pankhawm ua movement i sustained zoh un tuh tulai tak a hunbi ahikha moh kei dia hia? chinuam i hi. Huai ziak in hiai galpi i maituah uh tui kitok nanung banga ngaiin pilvang takin kipumkhatna toh i pangzel ding uh aw.

Upa T. Pumkthoang in “Toupa a lungdam leh” chihla ah, “*i tung a Toupa alungkim kei leh, i luahsa gam zong mangthang thei hi. Lungmuang leh tawldam gam i luah theih na’ng, Toupa mah lungkim sak ding thupi hi*” achih thudik ahi. Sa leh gal ziakin Lamka khopi a zu-factory Khumujamba satchip ahi a, Pathian hon hahsiangna chikhat ahi i chi ahi. Himahleh i melmaten “narco-terrorists” chih minloh in thahchimit hon sawm ua poi petmah hi. Huchi ahih naklaiin i gam leitang

Poppy (kani) chinna dia i zat a, kilchih leh kongchih apan zu puaklut tupna lungsim i put lailai tel uh banglungsim nei i hi uh hiam? Mangthang vekleng le poisa lou chihna i hi diam? Pathian thangpaihna i sukkhak un tuh tua i luahsa gamleng mangthang thei ahildan thei gige ni. Gam Toupa a ahi a, Amah khut ah “*Hausakna leh pahtawinate na kiang a kipan*

ahi, bangkim tung ah thu na nei a, huan thilhihtheihna na khut ah a om a, na khut a mi tengteng hih thupina leh hatna piaktheihna a om hi (I Kronikil 29:12)” chih pawk kawm in. Pathian mitnauta i sukkhak ding uh pilvang petmah chiat ding in kon chial thakthak hi. Saptuamte kianga Kha thugen tuh bil neipeuh in za uhen (Kil 2;11). Amen ■

DOTNA LEH DAWNNA

↵ **Dongtu:** Dongchinpau, Vengnuam **Dawngtu:** Evangelist Upa Lianding Guite

↵ **Dotna:** Luka 2:14 na ah ‘Tungnung pen ah Pathian thupi henla, leitung a akipahpih mahmah mihingte lak ah lemthu leng hena chi uhi.

Hiai lemthu leng hen kichi pen ‘lemthu leng hen’ chih hizaw lou in Pathian leh mihing kilemna ding thu angelte’n tangkoupah hi zaw lou hia?

↵ **Dawnna:** *Hiai Laisiangthou a kigen ‘lemthu leng hen’ kichi pen mihing leh mihing kikal a kilemna gen ahilouh ban ah Leitung ah lemna omta hen chih himasalou in Eden huan a Adam leh Evite khelhna ziaka Pathian leh Mihingte kikal kisia,akitan,tangtawn a kimelmakna om pen Toupa Jesu Khrist Kros a sihna tungtawna kilemna omtheita/omta chih thu puanzakna ahi zaw hi. (Isai 59:1,2 ; Rom 5:1,10; Kol 1:21,22 ;1Tim.2:5,6). Khelhna ziaka tangtawna sihna leh kikhenna thuak ding leh bangchikmah Chiang a Pathian toh kilem thei ngeilou dingte a Tapa Jesu sihna tungtawn in kilemna hon bawlsakta ahil man in hiai ahi Tanchinhoih kipahhuai.*

‘Akipahpih mahmah mihingte’ kichi leng Pathian’ Tapa Jesu Khrist gingta a ana pomte tung ah Toupa Pathian hehna, thangpaihna hizawlou in, a hotdamna bawl a Tapa Jesu Khrist tungtawna Pathian lungkimna mite genna ahi hi. (John 1:11,12). Tua ban ah, mikhat Pathian toh a kal a hong kilem, ahong dik Chiang in a mihinpihte toh kal leng hong dik/hong kilem zel uh ahil man in leitung ah lemthu leng hen achih un mihing leh mihing kikal ah zat ding in zong dik thei veve hi. (Mat 5:9 ; 1John 4:19,21) ■

BIBLE STUDY



Pastor Tualthianmung Hangzo, Area Pastor, EBCC Bukpi

Text : Kolosate

Thupi : Paul in a hinkhua ah Pathian amasa in koih hi (4:2-18).

Thumapi: Kum thak 2024 hon musak a, i Laisiangthou bulsuutna sunzom thei di'a hamphatna hon pia i biak Pathian min i phat ahi. Kum lui December kha in khristian innkuan sung a khat-le-khat kizopna leh mohpuakna khenkhatte i na suutkhawm ta uhi. Tu January kha in Paul in saptuamte a hanthawmna nanung leh Pathian' kumpigam a di'a Paul leh a lawmte pankhawmna tungtawn in ei gingtute leng khat-le-khat kihanthawn tuah a Pathian' nna i sepkhawm ding uh ahildan kikumkhawm lehang i chi ahi.

Bung 4:2-18 sung hilhchetna.

T. 2-4na: *“Thum gige unla, kipahtu gen kawm in kiveng gige un. Khrist thuguk gen ding a Pathian in thu a dia kong a hon honsak theihna ding in kou leng hon thumsak un, huai thu ziak a hen a om ka hi. Ka gen ding bangtak a ka genkhiak theihna ding in.”*

T. 2na ah Paul in tangthupha puanzakna *ahihke'h* mission toh kisai a thum ding in saptuamte hanthawn hi. Hiai a “gige” chih thumal in lunglel hetlou a Pathian buan ding ahildan gen hi. Paul in thumna toh kisai in “kipahtu gen” chih

leh “kiveng gige” chih thumalte hon zang hi. Huai tuh: *Khatna ah*, Paul in hiai Laikhak mission veina toh a gelh ahiman in tangthupha tungtawn a hotdam a om lellel mite leh Pathian' thilhihtheihna tungtawn a hotdam a hong om zel ding mite ziak a kipahtu lungtang toh Pathian kiang a thum ding ahildan a genna ahi. *Nihna ah*, gingtute'n Jesu Khrist hong painawn ngeingei ding ahildan phawk a, huai hun a tun ma ngeingei a mi tampite hotdam a a-om theihna ding ua Pathian kiang a thum ding ahildan a genna ahi.

Laikhak bullam (1:3-10) ah Paul in saptuamte a di'a thum gige ahihdan gen a, tun ah amah leh a seppihte a di'a thum ding in saptuamte ngen hi. Tangthupha puanzakna tungtawn a mi tampite'n hotdamna a muh ding uh tuh a awlmoh pen ahihdan **t. 3-4na** ah kilang hi. Lungtang tawng a veina a neih pen semthei ding a Pathian in hamphatna a piak a, Khrist tangthupha mite theihshiam theih di'a chiangtak a a tangkoupah theihna ding a thum ding in Paul in saptuamte ngen hi.

T. 5-6na: "Hun na neih sung un atam theipen sem zel unla, polam mite lak ah piltak in om un. Michih bangchibang a dawn ding hiam chih na theihna ding un na paukam suak uh chisoh, hehpihna hi gige hen."

T. 2na a "kiveng" chih thumal sutzopna in Paul in "Hun na neih sung un" chi'n **t. 5na** hon pan hi. Gingtute'n Pathian' nna sepna toh kisai a hun hoih nei gige lou ding i hihdan leh i hondampa Jesu Khrist ngei leng hong painawn ding ahihman a, tua hun i neih sung ua a tam thei pen Pathian thupina di'a i sep ding uh genna ahi.

Paul in **t. 5-6na** sung ah mission nasep ding dan toh kisai in "polam mite lak ah piltak in om un" chi'n gen hi. Thumal "piltak" chih in omdan hoih gen a, "polam mite" tuh gingloute genna ahi. Gingtute piltak a om ding ahihdan genna in Paul in "na paukam suak uh chisoh, hehpihna hi gige hen" chi hi. Huai tuh gingtute' omdan leh paukam suakte, ginglou mite a di'a Pathian lunggulhna leh Pathian' thupina a muhna uh a hih ding genna ahi. Kampau leh omdan hoihloute ziak a Pathian' minhoihna gingloute lak a sukbuah a a-om ding Paul in a lauh pen ahi. Pathian zahngaihna i tan in i omdan leh kampaute a chituamna a hon tut keileh, mihaite loungal in tangthupha i gente uh pom nuam lou ding uh chihna ahi.

T. 7-9na: "Toupa a unau ngaihtak, nasempa muanhuai, sikha hihpih Taikikas in ka tanchin tengteng nou ahon theisak ding hi. **Onesimas,** unau muanhuai leh ngaihtak noumau lak a mi mah toh ahong ding uhi. Amau hiai lam a thil omdan tengteng ahon theisak ding uhi."

Taikikas tuh Timothy sik a Ephesa khua a saptuamte keem ding leh Titas sik a Crete khua a saptuamte keem di'a Paul in muanhuai a sak mipa ahi (Eph. 6:21, Titas 3:12). Toupa kumpigam a diing a Lam lauhuai leh sihtheihna munte a Paul taisan ngeilou ahihman in Paul in *“unau ngaihtak, nasempa muanhuai, sikha hihpih”* chi'n saptuamte kiang ah pulaak hial hi.

Onesimas tuh Kolossa khua a Philemon'inn a kipan taikhia, Rome khua a Paul tungtawn a Jesu Khrist a hondampa di'a pom *“sikha taimang”* ahi. Gawtna huaisetak, maizumna leh dinmun hoihlou pen a maituah ding tuh Onesimas a di'a a tantawk ahihlai in, Paul in *“unau muanhuai leh ngaihtak”* chi'n saptuamte kiang ah pulaak hi. Onesimas tuh khovel et in sikha hoihlou himahleh Khrist vang a mi ngaihhuai leh manpha hong suak chihna ahi.

Tanchinhoih nasepna toh kisai a Paul' thuakgimnate'n saptuamte naktak a hanthawn ding ahihman in Paul in Laikhak paw ding leh a tanchinte uh saptuamte hilh

ding in Taikikas leh Onesimas sawl hi.

T. 10-14na: *“Aristarkhas... Barnabas tupa Marka... Justas...Epaphras, in route chibai ahon buk hi, ama'n Pathian deihlam photphot a piching leh gingta tinten a na dintheihna ding un, a thumna ah route ading in akisuk gige hi. Luka, doktor ngaihtak leh Dema in chibai ahon buk uhi.”*

Paul in a tung a mi nga (5) a minlohte lak ah Aristarkhas, Marka leh Justas-te Juda nam akipan Paul panpihtute hi ua, Luka leh Dema tuh Jentel nam hi uhi. Epaphras in saptuamte awlmoh lua ahihdan genna in Paul in *“thumna ah route ading in akisuk gige”* chi'n gen hi. Hiai a thumal *“kisuk”* in tawltak a nasepna gen hi. Lycus phaizang (Kolossa, Laodisia leh Hierapolis) a saptuamte'n Toupa' deihdan a theihshiam ua, sinsakna dikloute sukbuai vuallouh di'a khalam pichinna (bukimna) a neihtheihna ding ua Epaphra in gimna tampi thuak a Toupa buan chihna ahi.

T. 10na a Marka kigen tuh tanchinhoih Marka gelhtu ahi. Marka in Paul' missionary

khualzinna masapen ah Paul leh Barnabas-te lamkim ah nusia in innlam ah kiksah hi. Tangthupha ziaak a tawlina leh haksatnate thuak zoulou a lungkia leng hithei hi. Himahleh, Marka tuh hong kipanthak nawn a, Toupa kumpigam a diing in a tawppha a muanhuai in hong kizang hi. **T. 14na** a Dema ahiehleh a bullam in thupitak in kizang mahleh khovel thupinate etlahna ziaak in Paul leh Luka taisan hi (2 Tim 4:10).

T. 15-17na: *“Laodisia khua a unau omte leh Nymphas leh a-inn a saptuamte chibai hon buksak un... Huan Arkippas kiang ah, “Nasepna Toupa a i muh pen tangtun ding in pilvang in,” na chi un.*

Paul in Kolossa khua a saptuamte kiang ah Laodisia khua a saptuam omte chibai buksak ding in ngen hi. Hiai ah Paul in munchih a gingtu omte khentuamna nei hetlou a awlmoh ahihdan kilang hi. Himahleh, Hierapolis genkhak a a-omlauh tuh thilmak ahi hi. A chetna ding omkei mahleh Laisiangthou suutsiam khenkhatte'n ah *“Nymphas”* chi'a Paul in a minloh pen Hierapolis khua a om hi ding in

gingta uhi. Baan ah, *“Nymphas leh a-inn a saptuamte”* a kichihna in innmun pansan a gingtute'n biakna nei uh ahihdan hon hilh hi.

T. 17na a Paul in Arkippas a gen pen Kolossa khua a om Philemon' tapa hi ding in Laisiangthou suutsiamte'n gen uhi (Philemon 2). Paul in amah toh kisai in *“Nasepna Toupa a i muh pen tangtun ding in pilvang in”* chi'n vaikhak hi. Epaphras omlouh hunsung a saptuam enkoltu a pang hi ding a, sinsakna dikloute ziaak *ahihke'h* haksatna tuamtuamte ziaak a lunglel hikha ding hi. Huaiziak in, Paul in saptuam kepna toh kisai mohpuaknate Pathian a kipan ahihman a, a tawppha a pang ding in hanthawn hi.

T. 18na: *“Kei Paul in keimah khut ngei a hiai chibai bukna ka hon gelh ahi. Ka kolbulhte theigige un. Hehpihna na kiang uah om hen, Amen.”*

Hiai a thuvual *“keimah khut ngei”* chih in Laikhak pen Paul mahmah akipan ahihdan chetna leh Paul in saptuamte a awlmohna a latsakna di'a chibaibukna pen amah khut mahmah a a gelh ahihdan genna ahi. A dangte ahiehleh

Paul in a kam a genthoh a, midang khat in gelhkhiatsak hi ding hi. Huan ah, Paul in tangthupha a tangkoupih theihna di'a saptuamte' thumna poimoh gige ahihdan genna in "*ka kolbulhte theigige un*" chi'n gen hi. Laikhak dang a a hihsek bang in Paul in vualzawl na kammalte in a laikhak tawpsak hi.

Thukhitna: I Laisiangthou bulsuutna sung ah Paul in zaleen lou ahihdan a genna in "*kolbulhna*" thumal thum veitak hon zang hi. Paul in a thuaknate haksa salua a saptuamte kiang a a suahtak theihna di'a thumpih ding a ngen hilou in, huai kolbulhna ziak a tangthupha a gen theihlough khak ding lau himaizen hi. Huai tuh Paul in ama' nopsakna ding sang a Pathian' deihdan thilte amasa a koih chihna ahi. *Na hinkhua ah Pathian a thupipen in na koih kha hia?*

Baan ah, Paul in a lawmte min tampi a hon taklat kawm in, amaute toh a kizopna leng hon genchian ngal zel hi. Khrist a lawm muanhuai a neihte' panpihna tungtawn a Paul in thupitak a Pathian' nna sem thei

ahihdan kilang hi. Midangte panpihna dong hetlou a mahni vuak a thupi leh lohchingtak a Toupa nasem kuamah omlou ding hi. Paul bang in Toupa'n hon zang chitchiat keileh leng, Paul' lawmte bang a ginomtak a midangte panpihtu ding in kuapeuh i kizat theihna uh om chiat ding hi. Pathian' nasepna tuh gingtute tengteng pangkhawm (*team work*) a sep ding ahihdan sinlai hoihtak i mu hi. *Saptuam sung ah Pathian' thupina ding in bangchi'n na kizang a?*

Toupa'n hon vualzawl hen aw!

Laibu ette:

Dunn, James D.G. *The New International Greek Testament Commentary: The Epistle to the Colossians and to Philemon*. Grand Rapids, MI: The Paternoster Press, 1996.

Geisler, Norman L. "Colossians." *The Bible Knowledge Commentary: New Testament*. Eds. John F. Walvoord, Roy B. Zuck. Colorado Springs, CO: Cook Communications Ministries, 2004.

Hendriksen, William. *Baker New Testament Commentary: Expositions of Colossians and Philemon*. Grand Rapids, MI: Baker Books, 1964.

MacArthur, John. *The MacArthur New Testament Commentary: Colossians*. Chicago: Moody Press, 1992.

O' Brien, Peter T. *Word Biblical Commentary Volume 44: Colossians, Philemon*. Waco, TX: Word Books, 1982. ■



Gammial Aw

Gammial Aw simtute tengteng i Toupa leh Hondampa Jesu Khrist min in Kumthak 2024 Chibai Aw! Kum 2023 i zatlai in, gambuaina ziak in haksatna leh mangbatna tampi phukha mahlehang Toupa'n A gamna i sepna ah agah tampi hon muhsakte ziak in kipahhuai i sa mahmah a thupina tengteng i khusak hi. Kumthak 2024 a i lut toh kiton in, Pathian vualzawlna leh khamangthang tamsem i matna kum honghieh ngei lametna lianpi i neih bang a, tua bang hithei ding a panla chiat ding in saptuamte i kichial hi. Tua ahihman in, A misiangthoute'n Pathian mission i sepna ah thumna leh thilpiak a thathak la a, kalsangtawi a khamangthang tamsem Jesu Khrist khebul tut ahih theihna ding a i pantheihna lamlam a kisuuk a panla nawn ding in i kingen hi. Toupa'n field a i sepna gah hon piaknawnte leh kalsuanna i neih hiai anuai a te enkhawm nawn ni.

A. HIMALAYAN MISSIONS FIELD

KIPATHU GENNA LEH THUMNA DINGTE:

1. Toupa'n gingthak mi 16 (*Imsawa ah 2, Chisang ah 2, Gopetar ah 1, Shantinagar ah -2, Memeng ah 2, Himkhim ah 1, Ektin ah 2, Budhabare ah 2 leh Bihidin ah 2*) hon piakte leh baptisna tangthak mi 8; (*Gopetar-1, Himkhim-1, Bhuttabari-6*) hon piakte ziaikin kipathu gen ni. Gingthak leh baptisna tangthakte a khalam kalsuanna ding uh thumpih ni.
2. Sikkim Mission Field a masapen hiding in November 19, 2023 in Singshore (Takuthang) biakin honna leh latna Rev Dr. Thangminlun Mangte, Field Superintendent in nei hi. Kipathu gen in, Toupa vualzawlna toh gingtute'n biakhawmna nuam leh manpha hon neihtheihna ding un thumna toh delhzui ni.
3. Toupa'n semtute a sepna tungtawn ua a hunhun a khamangthangte a hotdamna huang sung a hon pilut sakzel ziak in kipathu gen ni. Ban ah, semtute'n Pathian thu lunglut houlimpih a neihte uh khasiangthou in a lungsim ua na hon

sep a, Jesu Khrist hondampa ding a hon santheihna ding un thumpih ni.

4. Central Nepal a semtute'n lamzang leh chidamtak a hon sepzom theih zel ua, a sepna mun ua mite leng a lungsim uh a ki honna ding un thumna in phawk ni.
5. Toupa'n kumthak chidamtak a hon muhsak bang a, semtute'n leng Pathian vualzawlna a tankum uh hong hih a taksa, lungsim leh kha damna hoihtak toh kal hon suanzom zel theihna ding un thumpih ni.

B. DHEMAJI MISSIONS FIELD

KIPATHU GENNA LEH THUMNA DINGTE:

1. November 29, 2023 in Lachan area ah baptisna piak theih ding Toupa'n hon piakziak in kipahtu gen ni. Toupa a ding a mi muanhuai hong hihtheihna ding leh a khalam kalsuanna ding thumpih ni.
2. Gingtute a tamzaw a nek-le-tak zonna uh lou nasep ahi a, a louma ua piang Pathian a kipan vualzawlna a tante uh sawm-a-khat ginom tak a pethei zel ahihman un kipahtu gen ni. Pathian ompihna toh a loumate uh hong gahsuah zel theihna ding in thumpih ni.
3. Native Evangelist dan a khaloh i piak hilou himahleh semtute a na kithuahpih thei banah amau a veina nei a a vengsung ua counselling a na bawlthei zel gingu i neihte ziak in kipahtu gen ni.
4. Field in Pathian gamna sepna maban a zazaw gelna leh etna a a bawl Lachan Study Centre lamzangtak a pai hoih zel ahihman in kipahtu gen ni. Gahsuah leh manpha a hong kizatna na ding in thumna in phawk ni.
5. Mrs Debolata Doley kichi ginglou himahleh ei gingtute pasal (koppih) in nei hi. Semtute'n Pathian thu a houlimpihna a neih uh tungtawn a Pathian kha nasepna toh gingu hong hih a, Jesu a Lal leh hondampa ding a hon san theihna ding in thumpih ni.
6. Khristiante ading a hunpi poimoh mahmah Khristmas hun a semtute'n amau Station chiat a Study Centre naupangte lak leh gingtute lak a Programme tuamtuam a saite uh tungtawn

a ginglouni a sukkhakte un Khristmas poimoh dan a hon theihchet sem ua, Jesu a Hondampa ding ua hon santheihna ding un thum ni.

7. Field in Hostel -cum- Training Centre a training a piaklel **Mr Roktim Doley** maban a leng Laisiangthou sin lunglut mahmah in tu a Hernia problem a neih Toupa apan damna ngetsak ni.
8. EBC Lachan ah Pathian vualzawlina leh makaihna toh November 29, 2023 in Pastor S Thangbiakmang khut tungtawn in saptuam dan a kiteng nupa kopnih omthei ahihman in kipahhuai i sa mahmah hi. Amaute'n Khristian inkuan diktak hon tunding theihna ding un thumsak ni.
9. Kumthak a Toupa'n semtute sep dingdan lampi hoihsem a theihsak a, field a khamangthang matna nasep hatsem leh lohchingtak a hon septouh theihna ding un thumna toh delhzui ni.

C. MANIPUR MISSIONS FIELD

KIPATHU GENNA LEH THUMNA DINGTE:

1. November 27, 2023 in semtute'n Workers' Fellowship Nambol ah Pastor (Rtd.) Kh Ibobi Singh tenna inn ah lamzangtak leh buaina bangmah omlou in zangzou thei uhi. Hiai hun ah semtute a tamzaw paikhawm thei ua, sharing, report leh thumkhawmna hun manphatak zang thei uhi.
2. Manipur Missions Field nuai a gingtute'n Pathian phatkhawmna leh biakkhawmna manphatak in a na nei theizel uhi. Huchihlai in, Mr Robindro Singh, Local Secretary, MEBC Langol in migiloute khut a na thuk khak ziakin gingtute lak ah patauhna leh thawmhauna lianpi tun ahihman in field a gingtute thumpih ni.
3. Manipur galbuai nung in Immanuel English School, Thiyam Konjin leng paitou thei zel a, amah leh amah kitoudelh ahihman in kitoudelh thei hamham ahihdan report tungtawn a muh in om hi. School toh kisai a sep leh bawl ding tampi omlaite Pathian deihna bang a kalsuanna hong hih theihna ding in nakpi in School Ministry thumpih ni.

4. MEBCC Jiribam in November 25-26, 2023 sung Revival Programme a neih uh lohchingtak a zouthei ahihman un kipahtu gen ni. Toupa'n hotdamna kitheichian mi nih a hon piak ziak a kipahtu gen in, a khalam kalsuanna ding uh thumpih ni.
5. Field BYF Secretary M Guneshwor in November 20, 2023 in Saptuam Dansiangthou in koppih nei hi. Hiai bang hun haksatak kal a hangsantak a Pathian minlou a kitenna a neih uh thupi leh etton huai i sa mahmah a, daltu omlou a kitenna programme zou thei ahihman un kipahtu gen ni.
6. Oinam Fellowship biakna hun ah kikhawm mithumte November 19, 2023 in semtute'n Counselling a na neihpih thei ahihman un manpha i sa hi. Counselling neihpih ahihna tungtawn ua Jesu Khrist a hondampa ding ua hon san theihna ding un thumpih ni. Hiai bang hun haksatak lak a houlimpih theih ding Toupa'n hon piakte ziak in kipahtu gen ni.
7. Field a semtute'n a mohpuakna uh chihtakna leh Pathian belamte itna tak toh a kepzom theihna ding uh leh hun haksatak a gingtute a dia ginna lam a etton theih a honghih zomzel theihna ding un thumpih ni.
8. MEBCC Thamnapokpi in Biakin kihal masapen kou ka hihman un a kikhawm masapen leng ka hih ding uh a chih dungzui un apaita December 03, 2023 in mipi biakkhawmna na nei thei ahihman un kipahhuai i sa hi. Hiai bang hun haksatak lak a Pathian min a biakkhawmna a neihngam uh thupi i sa a, maban a leng Pathian ompihna toh lamzangtak a biakkhawmna hon neih zomzel theihna ding un thumna in nakpitak in delhzui ni.

D. HOJAI MISSIONS FIELD

KIPAHTU GENNA LEH THUMNA DINGTE:

1. November 10, 2023 in Udaipur, Hojai ah gingtu hinailou unau mithum Pathian thu a houlimpihna leh thumsakna semtute'n neihpih thei uhi. Pathianni chiang a semtute'n fellowship a neihhunte ua houlimpihna a neihna tungtawn ua Jesu Khrist hondampa ding a hon santheihna ding un thumpih ni.

2. Tuni chiang dalna omlou in Home Tuiton tungtawn a i sepna lamzang tak in paithei zel hi. Naupangte lai chauh sinsakna piak hilou ua, Bible tungtawn in sappau a pau dan leh thu-le-la tuamtuam sinsakna piak in om uhi. Nu-le-pate lak ah tanchinhoih puanzakna banah maban paizel dingdan kikupna leng neihpih in om zel ua, tua hunte ah nu-le-pa tamtak kihelte lak ah Pathian thu lunglutte houlimpihna banah Gospel tracts piakna leng neih in om zel hi.
3. Semtute leh gingtute banah sepna ziak a Hojai pansan a gingtu omte'n Fellowship Centre Rampur, Hojai ah biakkhawmna neithe i zel uhi. Kipahhuai i sa a, tuni chiang dalna omlou a lamzangtak a zangzel thei ahihman un manpha i sa a, lamzang leh lohchingtak a biakkhawmna hunte hon zatzel theihna ding un thumpih ni.

E. DIMA HASAO MISSIONS FIELD

KIPAHTHU GENNA LEH THUMNA DINGTE:

1. Kolabari khua a naupangte lak a tuiton tungtawn a Pathian gamna i sepna paitou thei zel hi. Tuiton Centre kim-le-kiang a khua omte leng a vangkim in semtute'n phathei zel ua, naupang nu-le-pate kiang pha in, houlimpih theih ding mi lemtang omte leng houlimpihna neithe i zel ahihman un kipahhuai i sa hi.
2. November 28, 2023 in Hojai station leh Maibang station a semtu omte'n a khatveina ding in Joint Worker's Fellowship hun manphatak zangkhawm thei uhi. Hiai bang kithuahkhawmna semtute'n salam-le-khalam a phattuampih mahmah ahih dan uh leh Pathian gamna sepna a leng tha kigottuahna ahihman in manpha sa uhi. Programme hun in maban panlak dingdan kikupkhawmna leh semtu khat-le-khat kihanthawmna hun in leng zang uhi.
3. Semtute'n Dimasa namte ading leh a khua kim-le-kiang a mimal, khotang leh sahkhuah vai a puaknat a neihte uh tungtawn leh amaute'n Pathian hing a theih ding uh deihna in Prayer Walk nei in kalsuan zel uhi. Kalsuanna gahsuh leh manpha hong hihna ding in thum ni.

4. Semtute'n a vangkim a Pathian thu a houlimpih theih ding neizel ahihman un manpha i sa hi. Pathian thu houlimpih ahihna tungtawn ua Jesu khebul tut hong hihna ding un thum ni.

F. GOALPARA MISSIONS FIELD

KIPAHTHU GENNA LEH THUMNA DINGTE:

1. Tuiton Centre tungtawn a naupangte lak a i sepna Pathian pina leh makaihnate ziakin masawn zel hi. Naupangte leng awlawl in kibehlap touzel ua, tuin naupang 6 bang phatheh panta hi. Naupangte tungtawn a gamkek ding tup-le-ngim ahihman in thumna in phawk ni.
2. Semtute'n kalkhat a khatvei bek kithuahkhawmna neih ding tup a a neih bang un kithuahkhopna manphatak in neitheh zel ua, tua hunte in thumna leh maban paiding dan kikapkhawmna hun in zangzel uhi.
3. Field a semtute'n a sepna mun ua mite houlimpihna sunzom tou theh zel ua, himahleh khenkhat a khotang kivaipuak dan uh a khauh luatziak leh a zahtak ziak un deih bang in kalsuan theilou uhi. Pathian ompihna toh kal hon suanzom theihzelna ding un thum ni.
4. Pathian thutak a houlimpih theih ding lawmbawlsa semtute'n bangzah hiam neitheita ahihman un kipahtu gen ni. Amaute'n Pathian thu a houlimpihna tungtawn ua Jesu Khrist hondampa ding a hon santheihna ding un thum ni.
5. Nabakumar Rabha leh Chiranjit Rabha-te inkuan Pathian kha in a houpih zomzel a, Pathian thu theihbeh utna lungsim a neihna ding un thumpih ni. Tulel dinmun a semtute'n amaute lam-etna lianpi nei himahle uh a khotang kivaipuak dan uh khauh mahmah a, RSS Hindu hatna gam ahihman in haksatna tampi om theite lak ah Pathian in kong hong honsakna ding in thum ni.

G. KAMRUP DISTRICT A SEPNA DINMUN

1. Assam a Kamrup District ah Evan Daizachin in Loharghat station pansan in sem a, Evan Kaplun Paite in Chaigoan station pansan in Pathian ompihna toh semlel hi. Amaute'n Pathian

ompihna toh lamzangtak a sem in, Pathian thu a houlimpih theih ding piak a om theita ahihman un kipahthu gen ni.

2. Evan Daizachin in a sepna mun ah Mr. Joy Kumar Tanti khanih sung tanchinhoih a genpih nung in November 2023 in Jesu Khrist hondampa ding a sang in Khristian hih ding manta hi. Himahleh, a inkuanpihte leh a tanaupihte ua pan vauna tuamtuamte ziaq in maban sawn theihlough in om hi. Toupa'n ginna hatsem hon piaksak a, gingu muanhuai hong hihtheihna ding in thumpih ni.
3. Semtu Evan Kaplun Paite in a sepna mun a Rabha mite toh kimeltheihtuahna leh lawmbawl na neitheih zel ahihman in kipahhuai i sa hi. Doutu, subuaitu leh nawngkai theihna chituamtuam tuaklou a, Toupa humbitna toh chidamtak a hon sepzom zel theihna ding in thumpih ni.
4. Kumthak a semtute'n Pathian Khasiangthou thopna leh makaihna toh lamzang leh gahsuahtak a hon sep ua, gingu mite kiang a tangthupha zaksak hong hihsem theihna ding in thum ni. ■



DORCAS *Corner*

Buaina leh haksatna tampi paikheng a damtak a kumthak - 2024 hon musak Pathian min phat in Hondampa Jesu Khrist min in simtute kumthak chibai k'on buk hi. Kumthak, hunthak ah Toupa'n hon pitung nawn a, Saptuam pumpi in thupi ding a telkhiak 'Kipumkhatna' Eph.4:3 mah zang in Dorka pawl in thupi khennenna bawl ahi. Huai dungzui in January kha ading thupi, 'Kipumkhatna bang ahia' chih toh kisai saulou houlim ni.

Kingaihnamna leh migitna tengteng, thuaktheihna toh, itna a kithuaktheih chiat in, Lemna Kha a kipumkhatna vom chinten ding in. A hon sapna pen lametna mun khat a sap na hih mah bang un sapum khat leh Kha khat kia a om hi (Eph.4:2-4).

Khrist pumpi a kipumkhatna sunglam a vaulau leh hihsiat theih ahihdan Paul in thei hi. Bible thutak mah pansan kawm in gindan diklou a mite pikawi ding in Saptuam hong veh a thulim lou chikchik a hehna leh kikhennate kipumkhatna hih seding a vanzat hoih mahmah ahi uhi. Paul mah inleng lungsim munkhat pu ding, kha a kipumkhat ding, lungtang a Khrist itna kilem in, misiangthoute kahasuan in, itna, hehpihna leh migitna masuan ding in kuapeuh hon sam hi. 1Kor.12 na in Khrist ah pumpi khat i hihthu hon hilh hi. Pumpi khat ah hiang chituamtuam om a, hiang chih in amau hihtheih bangchiat a septheihna leh thilpiak tuamchiat nei in tuate'n nasem khawm in pumpi khat kizentak in abawl hi. Hiai ah hiang chih amau a zalentak a omthei a hikei ua, khat leh khat ki-poimohtuah chiat in Khrist pumpi lamtou a a honsapna san semsuah ding a leitung a om i hi. Huai tuh Pathian in mimal chih kipoimoh tuah a omkhawm a khakhat a kipumkhat ding a hon bawl na ahi hi. Kha khat a kipumkhatna in insung nuam, khotang nuam, saptuam nuam leh gamsung nuam a hon bawl hi. Huchi in mimal hinkhua ah kingaihniamna hon tun a, khat leh khat kithihsiamna leh kilainatna hon tun hi. Ngai in, unaute kituak diamdiam a omkhawm a nak hoih in a nuam mahmah hi (Sam 133:1). Kithutuahna, kipumkhatna in thilhoih leh nuam hon tun in a lunggulh huai petmah hi. A leh lam ah Laisiangthou in kipumkhatlouna in kikhenna, kihuatna leh kimelmakna hon tun a hihdan hon hilh hi. Toupa'n a muhdah thil guk a om a; ahi, amah adia thil kihhuai sagih a om hi. Mit ki-uangsakte, lei zuautheite, mihoih sisan suah khutte; Ngaihtuahna gilou ngaihtuah lungtang, siatna hih ding a kintaite; Zuauthu gen palai taklou, leh unaute lak a kilemlouna chi tuh (Pau.6:16-19). Hiaite Pathian in a huat mahmah kipumkhatlouna ahi.

Khristian kipumkhatna tuh Saptuam ading a phatuam leh a chidamna bulpi ahi. Jesu'n a ngaih poimoh mahmah ziak in a nungzuite ading leh a kiang a ding gingtute ading in, "Pa, nang keimah a na om leh kei nangmah a ka om bang in, amau leng eimah a aom nading un; nang kei na hon sawl chih khovel in a taksan theihna ding in (Jn.17:21) a thumsak hi. Gingtute i kipumkhatna in Pathian itna leh a thilhihtheihna ziak a hinkhua kikhekna khovel

in a hon muhna uh ahi. Khrist kha a kipumkhatna in mitam a hatna lel gen a hikei a, Pathian hihna leh hinna kikoppihte i hihna hon theichiansak hi. Pumpi i chih khat ahi a, hiang a nei a, pumpi hiangte tengteng tam mahle uh, pumpi khat ahi a; Khrist leng huchibang ahi (1Kor.12:12). Khrist pumpi koppichte amah kha a kipumkhat a hamphat pihte i hi. Toupa'n hon vualzawl hen.

*Dorced huhna EBCC Teikhang Pastor bial Rs. 1817/- ■

Reports

EBC RELIEF & REHABILITATION ACTIVITY REPORT

Saptuam in pangkhawm a, gal ziaak a haksatna thuakte, panpihna (relief) leh tundingna (rehabilitation) nasepna paitou zel in November 2023 leh December 15, 2023 kikal a kalsuanna tamlou report hiai bang ahi.

1. Relief haichi etkhiakna nei in November 16 ni'n EBCC Mawnglian ah Relief Sub Committee kalsuan uhi. Louzau ah haichi pou panpan leh khang hoih mahmahte etkhiakna nei uhi. Mawnglian a saptuamte'n nektak zonna khek dia thupukna abawl ziaak ua haichi relief kipia ahi. Asum in Rs.2,50,000/- vel man ahi a, lohching tadih hi a theih ahi.
2. Saptuam mi galtaita (IDPs) kiang ah relief van hawmna Nov. 29, 2023 & Dec. 5, 2023 in Gospel Centenary Hall kong ah neih ahi. Hiai hunte ah galtai inkuan kigawm 306 hong paikhawm uhi. Relief van kihawmte ahihleh Dimapur a Anma Integrated Development Association (AIDA) apan blanket leh EBC HQ apan Brite (50litre) galtai inkuan 1 ah khat chiat piak ahi.
3. The Congregation Members, CSI Christ Church, Tiruchengode, Tamil Nadu apan relief van tamkhop hongtung a, huaite relief centre ah Dec. 16, 2023 in hawmkhiak ahi. Relief vante- bedsheets, steel plate, bowl, toothpaste & toothbrush, handwash, sahbon, health mix, leh damdawi tamkhop ahi.

4. Kitundingna (rehabilitation) toh kisai in galtai haksia diakte lak ah **meithai** mi 5te ading Project Naomi Bawakta nuai ah inn lamsak kisawm hi. Inn-1 bawlina ah sum Rs.1,30,000/- bei ding hi. Huai ban ah, huhna mi/inkuan 6 kiang ah a kigawm in Rs. 96,000/- kipia a, mi 15 kiang ah kitundingna loan kigawm Rs.4,43,000/- pia in, belh theih ding Bukta (inn) amau kibawlsawm inkuan 9te kiang ah huhna sum Rs.50,000/- chiat (avan in) saptuam in kipe ding hi. Zodawm a khosak kipan ding inkuan khat kiang ah huhna Rangva 5bundle kipe ding hi.
5. October 2023 sung a saptuam pumpi apam **Relief Thohlawm** ki dongkhia HQ a i piakkhawm uh Dec. 15, 2023 tan in hiai bang ahi. Asum in **Rs. 14,95,052/-** only. Relief Thohlawm petute- NEBC, EBCC Manja, Chiaugal, Vengnuam NLK, Kohima, Kawlbem, Khominthang, Vaalveng, Nghathal, Mata, G Mualkawi, Tonglon T, Mission Compound, Chandigarh, Khawkawn, Lamzang, V Munhoih, Elim Veng, College Veng, Delhi, Jordan, Lanva, Dorcas Veng, Bethlehem, Hebron, Pethuel, NE Tangnuam, **Mualpi**, Thingkangphai, G Mawnglian, Mimbung, Gilgal, Hiangmun, Vengnuam MZR, Kanaan, Peniel, Teikhang, Tangnuam, Zion, Vangai Division, Thanlon Division, Shillong, Bangalore, Lamka Baptist, Lailam Veng, Bungmual, Pearsonmun, New Lane, Phaisan, Zoan, Immanuel HQ, Gamphajawl, Moria, Bethany, Phailian, Tuitengjang, Zenhang Lamka, Khuangkhai, Hiangtam Lamka, Tuithapi, B Kaljang, Chennai, Aizawl Dinthar, Aizawl East Thuampui, Kolkata, Singngat Division. Kuahiam maihkhak omleh Dorcas Hall thuzakpah ahoih ding. Toupa'n thupina tengteng tangta hen. ■

EBCC SINGSHORE/TAKUTHANG BIAKIN HONNA REPORT:

Toupa, Saptuam neitu in EBC tungtawn in Saptuam lamtou zel in, apaisa 2014 kum in Sikkim State a dinga EBC om masa pen hi ding in Singshore/Takuthang mun ah heutu leh makaiten fellowship ana pat tak man un, Saptuam neitu Toupa Pathian min phat in ainah phahtu heutute zahna ka pia hi.

Hiai fellowship tukum in kum 9 chingta a, huai sung in gingtu inkuan 6, milip 26 (numei - 15 leh pasal - 11) om lel hi. Huchi'n Pathian leh heutute deihsakna tang

in, 22nd September 2022 in a Building bawlina ding nasep kipan in 19th November 2023 ni'n a honna leh Pathian khut ah latna a ki neihteih man in thupina, pahtawina leh minletna tengteng Toupa ka pia hi.

Biakin bawlina nasep hunsung in tualsung mi ten hihtheih tawp suaha pang in, sing le suang kaihkhom leh amau septeih bang chiat sep banah sum-le-pai thoh in ki thalawp tak in neitu hihna toh ana sep man un pahtak tham uhi. Hiai hunsung mah in, Sikkim sunga om semtuten leng sum-le-pai kia hilou, tha mahmah in hunkhat ah va huh in septeih bawl theihte a va seppih man un a kipiak zohna uh chiamteh tham leh phat tham ching mahmah hi.

Huchi'n zohsiang ahih toh ton in, 19th November 2023 (Pathianni) zinglam dak 11:00am in, Rev Dr Thangminlun Mangte, FS in Pathian min thupina ding in a honna leh latna nei in, huai hun ah Pathian biakna leh phatna hun nuam leh manpha tak zat in om ngal hi. Khosung leh kho kim a mite leh Khrist a unau mun tuamtuum apan a uap thei chiang teng pai khom in, mipi 100 val in hun zatkhom hi a, huaite zoh in ankuang ki um khom in hun manpha tak mai Toupan hon zatsak man in Pathian min thupi phat in a tung ah kipahtu ka gen hi.

Finance apan Report kimu dan in: Biakin bawl sunga muhna teng: Rs. 897015.42/- leh zatna teng Rs. 894590/- pha hi. Hiaite bel Hq, Div, Field leh Saptuam pawl tuamtuum leh mimal apan thohkhom ahi hi. Biakin ahihle a vai feet 15 leh a dung feet 40 a sau ahi. Hiai tan honpi Toupan thupina, phatna leh min letna tengteng tang hen la, a Saptuamte sa le kha a hong khan semsemna ding un simtuten kipahtu genna leh thumna toh delhzui zel lai ding in ka hon ngen hi.

Ka kipak, Agam adia na seppih uh

- Rev Dr Thangminlun Mangte, FS/HMF ■

NATIONAL COUNCIL OF BAPTIST CHURCHES IN INDIA (NCBCI) ADHOC MEETING GUWAHATI AH NEIH IN OM

India gamsung a milip 1.4 Billion lak ah Christian te denomination tuamtuumte gawm in million 32 veel hi a, India ah za lak a 2.3 per cent veel kiji lel hi. Baptist a kimin lohte ahihle 5 million veel kiji hi. India a Baptistte lak ah pawlpi tuamtuum 35 vaal bang om a tuat ahi. Numei leh Tuailai te kikhai khawmna India Baptist Women Union (IBWU) leh Baptist Youth Fellowship India (BYFI) te kum bangzah hiam apat ana omta mahle uh Baptist Saptuam Pawlpi te India gambup huap a kikhai khawmna pawlpi sawttak ana omkei hi.

Baptist World Alliance (BWA) leh Asia Pacific Baptist Federation (APBF) panlakna in India a Baptist te kaihkhawmna ana omzel hi. Hiai toh kisai a panlakna gentham ahih leh American Baptist International Ministries panlakna in Hyderabad khopi ah Baptist Summit, 2019 sai in om a huai bohzuina in covid ziak in July 24, 2020 in

virtual meeting om hi. Hiai meeting Baptist saptuam heutu leh pawlpi tamtak apat tel ua,huai a thupukna dungzui in National Council khat bawlkhe ding in Working Committee phuan in om thei hi.

NCBCI BAPTIST PAWLPI TE KIKHAIKHAWMNA PIANNA:

India Baptist Leaders' Consultation 2022 (IBLC-22) chi a minvuah a om kimuhkhawmna poimohtak November 8-10, 2022 sung Kolkata Khopi a Hotel O2 Oxygen ah om hi.Hiai hun ah Baptist pawlpi te sawl (official Delegates) 51 tel in Baptist pawlpi 28 apat leh IBWU leh BYFI apat palai paikhawm ua, ei EBC apat in le Rev K Kamchinkhup leh Upa Lalthanghlun Guite vakihel kha thei uhi.Hiai a paikhawmte'n kituaktak in India gampup a Baptist te kikkaikhawmna bawlkhiat lemsa ua, Nov 9,2022 in National Council of Baptist Churches in India (NCBCI) phuhkhiat in om hi. Hiai hun ah NCBCI maban paitou didan enkai ding in mi 15 omna Adhoc Committee, EBC General Secretary Rev Dr S Vung Minthang tel in bawl khiat ahi. Hiai Member 15 te leh a hihna uh anuai a bang ahi.

President: Prof Rev Dr Akheto Sema
(CBCNEI)

V/Presidents:

Rev Dr J Chiranjeevi (South India)

Rev Dr Ajoy Kumar Lama (ABCC)

Rev B Zazawna Lai (LIKBK)

General Secretary: Rev Samaresh Nayak
(BCCEI)

Treasurer: Mrs Mercy Mayuri Moses

COMMITTEE MEMBERS

1. Mr Durasal R Marak (BYFI)
2. Rev Chowaram Daimari (NBBCA)
3. Rev S Vung Minthang (EBC)
4. Rev Janang Sangma (Garo BC)
5. Rev Dr R Zolawma (BCMizoram)
6. Rev Hemanta Kumar Singh (UBCA)
7. Rev G Vinay Kumar (South India BGA)
8. Mr Robert Surya Prakash
(Deccan Association)
9. Rev John Christopher (Maharashtra BS)

NCBCI AIMS AND OBJECTIVES TE AHIIH LEH:

(Hiai English a kon khak Eipau a nana suah theih uleh hoih di...lah ngai nasak kei uleh nou thu...) Maban a hiai Council, Govt. of India, Delhi khopi a Registration bawl ding dan leh thil tuamtuam sai didan kikum ding in Dec 4-5, 2023 Sung CBC-NEI Convention Centre, Guwahati ah meeting neih in om hi. Hiai meeting tel ding a EBC Hqtrs Dorcas Hall in hon sawlna leh NCBCI a General Secretary Rev Samaresh Nayak in hon chialna ziaik in kei le mi teeltuam tamlouchik lak ah ka vatel kha thei hi.

Hiai meeting na a thupukna tamlou i taklang ding hi, anuai a bang in.

- (i) November 9 pen NCBCI Foundation day dia namkip ahi.
- (ii) NCBCI tuh Government of India a Delhi khopi pansan a Registration bawl ding, huai dia poimoh tuamtuam Advocate toh kithuzak a sepsuah ding phasak ahi.
- (iii) NCBCI AGM 2024 Delhi khopi a August 2024 lak a neih ding phasak ahi.
- (iv) NCBCI National gathering 2026 Bangaluru khopi a neih ding phasak ahih toh kiton in huai dia Planning Committee di kiguang ngal hi.

- (v) Hiai meeting in kei (Upa Thangzalun Khuptiong) le Adhoc Member 15 lak a Member khat(co opted member) hiding in hon pomkip uhi.
 - (vi) BWA General Secretary Rev Dr Elijah Brown leh APBF apat Rev Vee tetseo-te kum nawn a April Kaal masa(Post Easter Visit) a India leh a biik a Manipur/ Lamka a EBC Hqtrs hong visitna di uh le kigenkhawm a, huai enkai ding in mi le kisp ngal hi. Hiai toh kisai a Visa khawng hon muh zoh chiang ua chiangdeuh a genkhawm thak hoih kisa hi.
 - (vii) Hiai a tung ate ban ah IBWU leh BYFI te'n maban a thil a sawmte uh report na leh Baptist kikkaikhawmna tuamtumte NCBCI GS in a veh didan khawng le kigenkhawm hi.
- Hiai Guwahati meetingna a delegtes te tunna leh nek lehtak senna omte Arunachal Pradesh a Nyishi Baptist Church in sponsored uhi.

Ka kipak

Report Petu:
Upa Thangzalun Khuptiong
 Central Delhi. ■



EBC Innsung Thu

CAMP REPORT LEH KIPAHTHU GENNA

EBCC Vaikhawtlang, Mizoram Division in Nov 22-26,2023 sung Thugentu Evan Damkothang zang in Hotdamna Camp ka nei uhi. Camper mi 66 khosung a Saptuam tuamtum apan hongtel uhi. Pathian in i thumnate uh hon dawng in, Mihing simna dan in mi 50 vel in Jesu Kris Lal leh Hondampa ding a sangthei leh kitheihchetna nei hunkhoptak muhtheih a a om man in kipahhuai kisa mahmah hi.

Pathian Khasiangthou ompihna leh kithuahpihna toh Camp gahsuh leh lohching tak a kizouthei ahihman in Thumtute leh Thilpiak a huhtute tung ah kipahthu hiai KTZ tungtawn in ka hon gen uhi.

Thupina tengteng Pathian kia in tangta hen.

- T/Upa V Khambiaklal
 Secretary, TBUC, EBCC Vaikhawtlang



Thu Tuamtuum

KIPAHTHU GENNA:

Date: 28-29, November 2023 sung BCD Lungchin in "ANNUAL DAY cum HEUTU' KISINSAKNA" hun ka zang ua, hiai hun a Thugen ding leh Sinsaktu din Rev. M. Ginminthang Child Co-ordinator EBC, kichial a; chial a ombang in Child Co-Ordinator in awlmohna lianpi toh hongkihah awngthol in Mr. Elson Thanglunmang toh hun hongzang uhi. Thugenna hun nih leh Kisinsakna hun khat Htp (CC) in zang a, Mr. Elson in Thugenna hunkhat zang hi.

Pathian kha polhna leh ompihna ziakin programme lohching tak a zattheih a aom ziaak in Pathian tung ah kipahthu ka gen ua Amah kia in thupina leh pahtawina sangpen tangta hen aw.

Huan, hiai programme zatna ding toh kisai a honkithuahpih a Chini leh sumtang a kithuahpihna mi kiphalte'n honpiak ziaak un leh thumna tampi toh ana pangte kipahhuai kisa mahmah in KTZ deihthohtak uh tungtawn in, Pathian min in kipahthu kon gen hi.

Kipaklua ung e...

Sd/- M Nenglianmang
Superintendent, BCD, Lungchin, Singngat Division

KIPAH THUGENNA:

Unaupa H Kaibiaksang s/o H Doukhanlian in IRB a asepn a Toupa vualzawlina ahidhan phawk in a khaloh masa tengteng EBCC Moria Pearsonmun Vengkhang Saptuam ah Toupa gam nasepn ding in hon pekhia hi.

Hiai bang a Toupa gam nasepn a kipe zoutak leh kiphah tuailai etton leh phathuai kisa mahmah hi. Toupa'n a maban a sepn ah lohching leh lamzang jel ding in pi in makaih jel hen.

- Upa T Laljem
Secretary, TBUC
EBCC Pearsonmun, Vengkhang





Ordain Sunna

1. Min: **UPA L. VUNGZAPAU**
2. Pianni: 1940 January
3. Pianna Khua: Senvon (Kaonjar Veng)
4. Pa Min: Pu Hausum (Suakdai) Langel
5. Nu Min: Pi Ngaigoih Hilsia
6. Zi min: Khawlkhanching Samte
7. Kitenni: March 18, 1972
Kitengsaktu: Rev. Nengzachin
8. Gil a gah goutan neihzah: 5 Pasal: 2 Numei: 3
9. Tu melmuh zah: 11 Pasal: 3 Numei: 8
10. Tulel a omna Saptuam: EBCC Central Lamka
11. Tulel a kizatna: TBUC Member
12. Ordain Kum: Dec. 7, 1988 Ordain Petu: Rev. T. Jamkhothang
13. Pahtakna Lai san kum: Dec. 12, 2010
14. Toupa kiang a tawldam ni: 20/11/2023 Vui ni: 21/11/2023
15. Natna/Damlouhna: Choledocholithiasis
16. Vuitu Pastor & Saptuam: Pastor Goubiakmuan, EBCC Central Lamka
17. Saptuam a kizat khakna:
Rostad Memorial High School ah 1967 -1991 sung sem hi. 1992 in Ebenezer Academy, New Lamka ah Principal in pang hi. 1993 apan Accountant EBC Dorcas Hall ah sem a, August 1, 2007 in a sepna apan retired hi.
18. A tanchin gelhbeh tuak sakte:
A naupan lai in, naupang fel, thumang leh taima mahmah ahih ziaik in mite deihsakna a tang hi. Midamtheitak ahi a, tep leh muam hihlou a kikem siangthou mahmah mi ahi. A pianna khua Senvon ah Class A - V, 1956 in ana zou hi. Pawl 5 a zoh zoh in Mission Chawmna ana mu a himahleh a neuluat lai ziaikin sungte leh tanaute'n " Milak a atuama omtham ahinaikei, aneu lolai" chi'n ana kuansak kei ua, Govt. School ah Ani Subah ah kipan nawn leuleu hi. A kum nawn 1957 in Thanlon ah Pa Helkhogin in tonpih in Class VI tan va zou hi. A kum nawn 1959 in Pu Dr. Hilkham in Thoubal ah tonpih nawn



in Saizauma High School ah Class VII -Class VIII tan kai hi. Kum 1960 in Residential High School, Chingmeirong Imphal ah Class IX- Class X tan kai a, Class X 2nd Division in passed hi. 1964 - 1967 in BA DM College ah zou hi. BA a zoh kum mahin Rostad Memorial High School, Mission Compound ah sepna Pathian zarin mupah hi. Hiai ah a sep kawm kawm in Correspondent in MA Private in zou hi. ■

1. Min: **UPA G GINKHOLAL**
2. Pianni: 1958
3. Pianna Khua: Bukpi, Thanlon Sub-Division
4. Pianthak Hun:
5. Pa Min: (L) Tualphung Guite
7. Nu Min: (L) Ningthuam Hrangchal
6. Zi min: Zelzaching sihsan a zinawn Mankhanching
7. Kitenni: 1985 Kitengsak tu:
8. Gil a gah goutan neihzah: 5 Pasal: 2 Numei:3
9. Tu melmuh zah: 4 Pasal: 4
10. Tulel a omna Saptuam: EBCC Pethuel
11. Tulel a kizatna: TBUC Member
12. Ordain Kum: Ordain Petu:
13. Pahtakna lai san kum:
14. Toupa kiang a tawldam ni: November 28, 2023
Vui ni: November 29, 2023
15. Natna/Damlouhna: Zunkhum
16. Vuitu Pastor & Saptuam: Pastor S Thangzamang, EBCC Pethuel
17. A tanchin gelh nop:
Sepaih kum bang tan hiam a pang nung in Medical Ground, 1985 in hong Pension hi. Amah khotang leh Saptuam ah ahieh theih tantan in kizang hi. New Lamka YPA Unit tuamtuan a hong kikhen in Vengnuam Unit President masa pen in pang hi. Bangtan hiam zunkhum a neih nung in 2022 vel apan khomu lou a om in anatna in zual lam hon nawt hiai hiai a damdoi in leh innmun a kep theih dan teng a kep ahieh nung in November 28, 2023 nitak dak 11:30 pm vel in Toupa kiang a hon khawl tawldam san ta hi. ■





Kipahthu Genna THUMNA MAKAI

DECEMBER 2023

1 SEPPATNI: Hehpihna ziak a Kumthak mel hon musak a hiai tan a honpi Pathian kiang kipahthu genni. Pathian vualzawlina leh makaihna toh tukum manphatak a i zat theihna ding in Pathian kiang kilan thak ni. Tuni Kumthak Program koipeuh a manpha leh lohching tak a i zat chiat theihna ding in thumni. Rev Nenglian in EBCC Hebron a thugen ding, Pathian kha ompihna ngen in thumpih ni.

2 SEPNAWNNI: Gamsung buaina in a sukkhak inkuan leh mimalmalte khalam leh salam a tunding ahiththeihna ding in thumpih thak ni.

3 NILAINI: I Saptuam leh minam sung a tawplou a thumtu leh thilpiak a tawplou a ana pang jel te ziak in kipahthu genni. Kumthak a Pathian apan a vualzawlina toh thathak toh pan hon honlak theihna ding un thumpih ni.

4 NINGANI: Zingchiang 5-7, January 2024 sung EBCC Lailam veng in BCD Chialpina nei ding, Evan Upa Lianding Guite thugentu in pang ding, Pathian khasiangthou kithuahpihna toh Manpha tak a zat ahith theihna ding in Campers leh camp saite thumpih ni.

5 SINTAWPNI: I Saptuam leh Lamka zang a school bangzah hiam in

CBSE affiliation a muh uh toh kiton in maban ah panlak ding tam mahmah in vaisai ding tam mahmah ahihman in hoih leh feltak a sai leh panlak ahiththeihna ding in thumpih ni.

6 KIGINNI: Zingchiang date 7 in EBCC Pearsonmun in TBCD heutute orientation leh thugenna hun zang ding, manpha leh lohchingtak a zat ahiththeihna ding thumpih ni.

7 NIPINI: BCD Sinlai bu kibawltthak introduce a omte a zangkha BCD lam in hohtak leh phatuamtak a hon zat theihna ding un sinsaktu leh sintute thumpih ni. Zingchiang in Dorcas Hall leh Division te ngeina bang in Office lutnawn ta ding uhi, Office staff te a ding in thum ni.

8 SEPPATNI: Singtang gam humbit a sun leh zan khawllou a frontline a duty te ziak in kipahthu gen in salam leh khalam a chidamna toh gam leh mite hon venbit zelna ding un thumpih ni.

9 SEPNAWNNI: NDPN nuai a nekzonna dohkan pansan a Pathian nasem ding a hong kipia leh screening a paisuakte maban kalsuan zelna ua thumpih in, a nasepte tungtawn a khamangthang tamsem Jesu khebul a hon tut theihna ding in thumpih ni.

10 NILAINI: I saptuam in Division thak bawlkhiak ding in panla lel uhi, hoihtak leh lamzang a sai ahitheihna ding in vaisaite leh hiai a kihelkha heutute thumpih ni. Hiai in a hon sukkhak ding divisionte leh saptuamte ading in leng thum ni.

11 NINGANI: Headquarters level a department tuamtuam a committee thak kiguang ten Pathian ompihna leh makaihna toh kithalop tak a hon sep theihna ding un thumpih ni.

12 SINTAWPNI: Zingchiang 13-14 sung EBCC Songtal ah Chialpina nei ding ua Rev Kamchinkhup in thugenna hun zang ding, chialpina vaisai leh thugentu leh saptuam mipi Pathian kha pawlna tang a manpha tak a zoh ahitheihna ding in thumpih ni.

13 KIGINNI: Tuni in BCD sinsaktu orientation leh sinlaibu thakte pulakna EBCC Tlangnuam, Aizawl South ah, EBCC Aizawl, EBCC Thuampui apan BCD sinsaktute tel ding, Rev M Ginminthang, Child Coordinator in sinsakna pe ding thumpih ni.

14 NIPINI: Tuni in EBC sung ah piching leh naupanglamte nipi school kipan nawn ta ding, michih in kisinsakna phattuampih leh hinpih thei ding in piching leh naupang lam a sinsaktu leh sintu dingte Pathian kiang ah lan in thumpih ni. Tukum a piching lam nipi skul Galatia laibu i sin ding uh mi tamtak in manpha tak a i zat theih ua, i phattuampih theihna ding in thumni.

15 SEPPATNI: Pastor dia lakthak a om mi 4 te assignment tuamtuam a kisinna nei ding in tukum sung mohpuakna piak a om bangbang lohchingtak a hon zoh theihna ding un thumpih ni.

16 SEPNAWNNI: Zingchiang apan 22 tan daih ding in EBCC Bukpi in BCD Camp nei ding ua, Evan Upa Lianding Guite thugentu in pang ding hi, Camp lohching ahitheihna ding in Pathian khasiangthou kithuahpihna leh ompihna ngen in thumpih ni.

17 NILAINI: Rev Dr. B Gin Neithang taksa lam a hatlounna tuamtuam nei ahihmanin a hong dam a hatna ding a Pathian thilhih theihna ngen in thumpih ni.

18 NINGANI: LRRC a nasepna leh kikepna tuni chiang in mitamtak in phattuampih mahmah uhi, hiai a semtu omte'n tha-it tak leh kipe zoutak a hon sep zel theih ua mi tamtak in kha leh sa a suahtakna hon muhna ding un thumpih ni.

19 SINTAWPNI: Gamsung buaina toh kisai a tuni chiang hon na makaih heututen kipumkhatna toh hon makaih theihna ding uh leh mipiten heutute thuman dan i siam nading un thum ni.

20 KIGINNI: Tuni leh zingchiang in EBCC New Lane ah Missions Chialpi nei ding ua Rev Kamchinkhup in thu gending. Hiai chialpi tungtawn a saptuam in missions lam a khanlohna thupitak hon neitheihna ding in thumpih ni.

21 NIPINI: Tukum a pawl 10 leh 12 Manipur Board nuai a exam ding te kisakkholhna pai lel, gamsung buaina ziak a nawngkaina bangmah omlou a sai ahihtheihna ding in thum ni.

22 SEPPATNI: Saptuam sung a semtu department tuamtuam a kisuan kual te amau mun chiat lamzang leh bittak a a tun theihna ding un thumpih ni. Mun thak a Pathian ompihna toh lohchingtak a hon sep chiat theihna ding un thumpih ni.

23 SEPNAWNNI: Nikum May 3 a i buaina in tuailai tamtak siamsinna leh hinkhua sukha mahmah in tamtak in maban zom theilou in om uhi, tukum a Toupa'n kong a honsakna ding leh hon zop ua zoh theihna ding un thumpih ni.

24 NILAINI: Zingchiang apan 28 sung EBCC Mata in Chialpina nei ding ua Evan T Damkothang thugenpi in pang ding hi. Chialpina gahsua leh manpha ahihtheihna ding in thugentu leh chialpina a tel ding saptuam mite thumpih ni.

25 NINGANI: Tuni a kipan in 28 tan daih ding EBCC Mualkawi ah BYF Camp nei ding uhi, hiai hun Evan Upa Lianding Guite thugentu in pang ding hi. Tuailai tamtak in suahtakna leh khalam a damna hon neihna uh ahihtheihna ding in Thugentu leh camperte thumpih ni.

26 SINTAWPNI: Tuni India in Republic Day lopna hun zang ding hi. Central Government in mipite lak

a khentuam omlou a India masawinna leh khantouhna ding a vai hon hawm theihna ding un thumpih ni.

27 KIGINNI: Pathian thu toh kisai a magazine tuamtuam kibawl te mi tamtak in phattuampih mahmah uhi. Hiai nasep tanchinhoih puanzakna nasep kahiang khat ahihman in a saitou leh thusuah ding hon pezelte ziak in kipahtu gen in a sepna uh hohtak a a paizom theihna ding in thumpih ni.

28 NIPINI: Saptuam nasepna kahiang poimoh mahmah Convention Book House a manager leh semtute chidamna leh hohtak a hon septheihna ding un thumpih ni.

29 SEPPATNI: Kumsim khawmpi 75na hun in saptuam kemtu ding Pastor 6 leh Upa 49 te ordination piak in om uhi, amaute'n a kep uh saptuamte ading a kemtu leh makaitu muanhuai ahong hihtheihna ding un thumpih ni.

30 SEPNAWNNI: Grace Bible College tungtawn a Pathian gam nasepna tuni tan lamzangtak in paitou thei zel, huai a sintu naupangte leh sinsaktu leh office staffte Pathian khasiangthou ompihna leh makaihna ngen in thumpih ni.

31 . NILAINI: Tukum a diing a kha masapen nitawpni tan a honpi Toupa tung ah kipahtugenni, i sepkhelh bawlkhelhte ziak a thupha tawi in, kha thak chidam a i muh theihna ding in thumni.



Postal Regd. No. MNP 07 | Regd. No. 22344/70

BOOK POST



If undelivered, please return to

The Editor,
CHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India



Edited & Published by Rev. S. Vung Minthang for the Evangelical Baptist Convention
Designed and Printed at Convention Book House, Dorcas Hall Campus, New Lamka - 795006